

5

HARVARD COLLEGE LIBRARY
FROM THE
HARVARD-YENCHING
INSTITUTE
SEP 30 1929

~~Ch L 5570^{7P} 2928~~

~~T 5237.7 2928~~

明詩綜卷九

小長蘆 朱彝尊

錄



海昌 馬思贊 緝評

楊基 四十九首

基字孟載其先蜀人居於吳為饒介客吳平安

置臨濠復徙河南既而放歸起知滎陽縣謫鍾

離用薦為江西行省幕官坐罪落職居句曲山

中久之起奉使湖南廣右召還授兵部員外郎

出為山西按察副使進按察使尋被讒奪職供

役卒於工所有眉菴集 徐子元云孟載天機雲錦自然美麗

美云孟載如西湖柳枝綽約近人情至之語風雅埽地 江東之云眉
菴詩禮麗纖蔚大有唐人風味 顧玄言云廉訪才長逸蕩興多雋永

方之錢劉雖未迨元白斯有餘 錢受之云孟載少負才名會稽楊廉
 夫來吳下於坐上屬賦鐵笛歌即效鐵厓體廉夫驚喜與俱東謂從游
 者曰吾在吳又得一鐵優於老鐵矣孟載沒後詩多放失吳人張習企
 翹訪求編次得十二卷 陳卧子云孟載如吳中少年輕俊可愛所乏
 莊雅 李舒章云孟載如玉袖臨春翩翩自喜 王介人云孟載詞勝
 於詩其詠春草云六朝舊恨斜陽裏南浦新愁細雨中亦不失為佳句也
 靜志居詩話吳中四傑孟載猶未洗元人之習故鐵厓亟稱之王元美
 卮言謂孟載七律尚短柳如新折後已殘梅似半開時類浣溪沙詞中
 語予謂不特此也如芳草漸于歌館密落花偏向舞筵多細柳已黃千
 萬縷小桃初白兩三花布穀雨晴宜種藥葡萄水暖欲生芹雨韻風頑
 枝外蜨柳遮花映樹頭鶯花有底忙衝蜨過鳥能多慧學鶯啼且自細
 聽鶯宛宛莫教深惜燕恩恩春色自來皆夢裏人生何必在尊前燕子
 綠蕪三月雨杏花春水一羣鵝江柳淨無餘葉在渚蓮池有一花開花
 裏小樓雙燕入柳邊深巷一鶯啼江浦荷花雙鷺雨驛亭楊柳一蟬風
 山頂雪惟朝北在水邊春已自東來一路詩從愁裏得二分春向客中
 過春水染衣鸚鵡綠江花落酒杜鵑紅高樹綠陰千嶂濕野棠疎雨一
 籬香立近晚風迷蛟蝶坐臨秋水映芙蓉羅幕有香鶯夢暖綺窗無月
 鴈聲寒著暈淺蟬橫曉綠臉消殘纈膩春紅小雨送花青見萼輕雷催
 笋碧抽尖蠶屋柘煙朝焙蘭鵲爐沉火晝熏茶試填入浣溪沙皆絕妙
 好辭也然其五言古詩足與季迪方駕集亦張企翹所編吾鄉項氏天
 籟閣藏有孟載手錄者菴集六卷中
 闕七言絕句以勘張本亦無大異

感懷六首

蝮蛇冬未蟄靡草寒更生陽光泄為雷忽有聲上
 天號令乖致此災異并不然多殺傷兵氣之所成漢庭
 免三公毋乃非政刑願言調玉燭仰見三階平
 一女不得織三人欲無衣一夫不暇耕八口皆啼飢飢
 寒迫于身誰能不為非西伯善養老仁人為己歸霜寒
 草木落禽鳥相背飛民心亦何求在於得所依此理勿
 暫失君子慎其微
 鵲巢知避歲終為鳩所居巧者勞不足拙者安有餘溪
 翁夜結網山人朝煮魚隆準入關中不讀半卷書當時
 微張韓乃與勝廣俱大拙乃至巧巧者復何如

日言終卷九
二
驊騮日千里亦在御者功向無造父能乃與凡馬同韓
彭夏駕材驅策遇沛公增本渥洼兒意不與項通豈獨
知馬難所貴御馬工駕御苟失宜鮮不敗乃翁蕭蕭帳
下騅千駟何足雄

鞬鷹斂六翮棲息如鷓鴣秋風颯然至聳目思凌霄英
雄在承平白首為漁樵匪無搏擊能不與狐兔遭長星
亘東南壯士試寶刀落落丈夫志悠悠兒女曹

東鄰夜從軍西鄰曉上官一為死別愁一為知己懽懽
者承新恩拂拭頭上冠愁者囑妻孥結束跨下鞍悲懽
何不同一危復一安黃塵障東華平地生波瀾朝榮夕
賜死轉盼異暑寒寄語承恩人莫歎從軍難

送謝雪坡防禦出郭團練

朝催築城夫暮點團結兵民皆動搖一日十數驚所
賴官長賢撫勞得衆情防禦出郊來父老拜且迎垂髫
及戴白羅列車下聽官家百萬師自足與寇爭汝自守
汝鄉汝自保汝生閒暇苟不虞倉卒恐見傾我當徼汝
勞薄爾賦稅征父老共感激闐然動歡聲旌旗泊甲子
五色稍鮮明豈惟備抄掠大敵固可嬰問君何能然子
弟衛父兄平川雨初收馬嘶鼓鑿鑿相送不同往極目
秋鷹橫

送陳資深歸廣

丈夫輕別離投老欲入廣奈何干戈際萬里涉沅澧茲

城頗阜庶有女供奉養世亂得鹿安胡勞問鄉鄙君言
苦無家一夕魂九往鄉書昨日至捧讀屢泚頽四喪寄
淺土未得掩諸壙雖云敞廬在誰復修祀享感茲歸意
迫無力猶勉強齒髮固已衰尚足嬰擾攘敢忘鄉土情
偷安戀茲壤吾聞重感激惜別復加賞天寒霜露繁
撼枯葉響水宿慎蛟螭山行避魍魎田園雖荒蕪果實
羅粟橡鄰居喜均還相邀具醅盃酒薄不得醉且復歌
慨慷人生還鄉樂無物堪比仿喜極繼以悲歡戚同反
掌翻思蘇臺月照女夜績紡此時父子情兩地同惚恍
安得混車書妻孥共羅幌茲事竟難期淚眼一悽愴我
家嘉陵江蹤跡久飄蕩亦欲問前途逡巡覓西瀼

登靈巖和韻周左丞伯溫饒大參介之

單臚集羣英席窄坐每盞煙橫半掩寺木落全見塔斜
流出渠分曲徑轉溪合村妝妍醜竝野話悲笑雜童操
吳音聞僧作梵偈苔霜苔滑難躋露棘手易拉磴紆螳
緣樹扉敞蝸啓闔娛賓列五豆禮佛過三帟晴厓暝憂
雨秋洞寒疑臘窗攀盜果援檐入避鸛鴿掬池萍沾袖
憩石蘚污衲琴忘荒臺弄屨響回廊踏值險慮思筇得
奇即傾榼感深怒鬚磔愁極衰鬚颯華年倏川駛雅量
浩海納嘯歌激欵歔雄辨肆交沓禪寂虛無量道祖清
靜蓋叩跽蝸觸蠻變幻雀化蛤狂遊類飲酎薄宦避嚼
蠟終當謝塵鞅埽屋分坐榻

贈別龔行義

楚龔風雲姿璞素玉不琢隻身躡雙屐十載食破研麻
衣閱冬春睥睨狐貉賤胷中何所蓄經史子集傳酒酣
文思涌強弩機發箭清真謝鉛錘越女巧笑倩紆盤珠
九曲精粹金百鍊粲如星森羅勇若軍後殿吾黨多英
雄氣索皮肉戰西風忽歸來塵土吹滿面從容問所歷
搖首不復辯但云秋水清吳松淨如練方同華表鶴遽
作幕上燕去住何太輕弗得絆以綫君材非樗櫟名字
已交薦淵泉暫蠖屈霧雨終豹變賢達坎坷多豪傑窮
乏先嗟子書中蠹髀消兩目眩朝騎瘦馬出夕飽藜與
覓志慙點爾狂質匪由也嘖猥遭周秦厄不識舜禹禪

因君動遐想翅塌足若胷螺卮白磁罌聊爲江渚餞回
首芙蓉花紛紛落紅片

與陳時敏別

近別會有期遠別易慘悽一人失意行衆賓顏色低相
顧各無語握手立大堤白沙飛輕煙赤草漫路蹊竈戶
八九家皮肉瘦且鷺再拜謁官長鵠立無所齎孤廳如
荒郵壁落新補泥日没官吏散角角野雉啼歸來對寒
燈兒女相孩提雖云去鄉國喜不聞鼓鞞官卑職易稱
牛刀用割雞回首華亭鶴月白露淒淒

季迪病目醫令止酒因作此勸之

病目須飲酒飲酒調微疴氣血鬱不舒賴此酒力和所

以雷公方製藥用酒多活血必酒洗散鬱須酒磨製藥
既用酒飲酒良匪他酒可引經絡酒能驅病魔病目不
飲酒此蓋醫者譌李白好痛飲不聞目有瘳子夏與丘
明不為飲酒過飲酒既無害不飲如俗何清晨呼東家
買置數斗醪爛醉瞑目坐滿面春風醅陶然物我忘夢
見孔與軻此藥豈不佳而乃止酒那我今勸君飲君意
無媿媿庸醫或見責請示耆菴歌

贈毛生

丈夫遇知己勝如得美官棲棲無聊中握手意便懽古
來豪傑人所就非一端狂言與危行初若不可干從容
兩陣閒一語九廟安狐貉不外飾而足禦大寒嗟嗟隴

西李願識荊州韓

長洲春

穀波流暖雲花光豔綠蕢津頭洗紅女蝴蝶上羅裙羅
裙秋水上明璫搖白槩飛下雙鴛鴦溘溘潮水響

滄浪波

入苑綠泱泱穀文融暖光東風吹白浪照見赤龍堂龍
堂負貝闕陰火春波熱鮫人賣髯綃夜夜唱明月

登南浦

開船別西山迤邐向南浦帆輕去自速初不用篙櫓蒼
蒼煙中樹橐橐響斤斧一女沙上汲衆漁洲畔語我行
歲云晏况復遠儔侶回首北歸鴻翩翩下寒渚

過小孤

大孤俯如盤小孤儼而立羣山如從使左右相拱揖孤
根屹撐拄萬竅爭噴噲瀏瀏陰風旋慘慘元氣濕江流
亘其下震怒莫敢汲泐為盤渦深馳作奔馬急躋攀或
失手一駛不可及我來值秋晚木落衆鳥集勿爨夜船
犀鮫人抱珠泣

望南嶽

我從匡廬來但覺諸山低嗟我望衡嶽雲霄與之齊下
有赤蛇蟄上有朱雀棲仰瞻祝融拔俯揖紫蓋迷五嶺
皆培塿三江為涔蹄巍然南服尊嵩霍相提攜封秩崇
君稱諸神咸朝濟丹書篆寶冊萬古封金泥百王重祀
典赤纁藉玉圭自非精靈通牲帛勞焚齋予方向遠道
無由陟層梯蒼蒼煙霞中喔喔聞天雞緬思昌黎伯恭
默開雲霓靈貺自昭格誠敬良可稽斯人久云沒感念
徒含悽

發衡州

五日白一髮十日皺一膚人生冰雪容終作鞞紋鹿鹿今
朝清鏡中已與昨日殊不憂鬚耆蒼但恐皮肉枯肉枯
亦常理所念非壯圖有親恩最深撫養勞勤劬憐我幼
失怙愛我如掌珠斯恩未及報不敢忘須臾書來得凶
問哀頓空號呼衣衾與棺斂弗得親走趨家山在萬里
那能返故都樹頭啞啞啼媿殺反哺烏有子初學言行

步要母扶已解索黎粟未知識之無重在託宗祀豈暇
問賢愚弟妹皆飄零遠在天一隅仲氏久無信夢中時
友于艱難斤鹵濱何以保微軀計工當已還母乃東歸
吳童僕各分飛僅有赤脚奴竚屨苦肺疾終夜聲嗚嗚
憐渠亦解事翦伐供樵蘇異鄉骨肉遠賴此相支吾嗟
我客梁楚隻身亦崎嶇白晝畏豺虎夜防狸與狐所賴
筋力強竄伏幸無虞今年覺衰倦自怯行遠塗東風洞
庭波落日青草湖魚龍來欺人煙濤慘糶糊茲晨過衡
陽霽景差可娛桃花白練帶春水綠菰蒲感此顏色妍
暫使憂心甦萬事信有命撫膺長歎吁

湘江道中思常宗

暮江散微雨風定波自碧一鷺立不飛雙鴻遞相直餘
煙菱女唱新月漁郎笛此處忽懷人相思杳何極

遠浦歸帆

輕帆挂春風倒影湘江綠天低浦溆遠歸向誰家宿遙
指落花西黃陵廟前屋

洞庭秋月

湘水秋更清湘月秋更白光輝一相蕩水月不辨色何
處洞簫聲巴陵夜歸客

湘女

湘水旣瀾瀾湘山亦峩峩空明影上下但覺魚鳥多我
方駐輕橈聽彼湘女歌湘女佩幽蘭徐行拂青莎春風

吹衣裾芳香動微波淑質自妍麗不待綺與羅真修慎
所適窈窕山之阿盈盈青樓婦日暮將如何

清溪漁隱

清溪秋來水如練歷歷魚鰕皆可見綠蓑酒醒鴈初飛
風急蘆花吹滿面溪南一帶是青山逢著垂楊便可灣
謾道白鷗閑似我漁舟更比白鷗閑

聞蟬

省菴四十未聞道偶於世事無所好尋常惟看東家竹
屈指十年今不到微軀之外無長物寒暑一裘兼一帽
妻孥屢欲升斗絕不獨無煙亦無竈身輕自笑可駕鶴
眼明豈止堪窺豹人情世故看爛熟皎不如污恭勝傲
有瑕可指未為辱無善足稱方入妙此意于今覺更深
靜倚南風聽蟬噪

廢宅行

弓刀挂牆旗拂瓦行人過門須下馬日暮將軍縱酒歸
白棒橫街人亂打朱門一閉春草積官印斜封泥浣壁
守卒收鰕屋後池鄰翁曬麥階前石簾幕當年盡綺羅
網絲顛倒腐螢多杏梁風雨丹青濕時有野鳩來做窠
樓臺易成還易廢前年猶是桑麻地

聞鄰船吹笛

江空月寒露華白何人船頭夜吹笛參差楚調轉吳音
定是江南遠行客江南萬里不歸家笛裏分明說鬢華

已分折殘堤上柳莫教吹落隴頭花

長江萬里圖

我家岷山更西住正見岷江發源處三巴春霽雪初消
百折千回向東去江水東流萬里長人今漂泊尚他鄉
煙波草色時牽恨風雨猿聲欲斷腸

秋霽雜賦

三首

劉表知先主懷王識沛公未聞收夏口先已入關中今
古車書異興衰曆數同方驚雞作鳳當信鶩非鴻

今日長洲苑秋風列羽旗不圖新約法復見舊威儀鼓
舞兒童樂歌謠父老悲煙埃方袞袞禾黍正離離

晚樹霜猶碧秋花雨未黃戎衣輕繡錦旅食尚糟糠驛

路千山隔河流一葦航毋憂兵不戰已定法三章

雨

雨急愁雲黑窗虛愛竹青石泉流細細山鳥去冥冥醉
裏傾荷葉飢來煮茯苓不知劉道士何用換鵝經

偶題

身懶交游絕時危感慨新清江催短鬢芳草怨歸人花
落縱橫雨鶯啼淡蕩春欲搖舟楫去波浪沒平津

送王仲容之上海

薄宦依東海孤城隔戍煙花疎寒食後人遠暮帆前深
巷編蒲履斜岡種木棉毋煩厭荒寂微祿有畬田

寄海鹽楊若官

明詩總集
海嶼通村險邊城出敵遙旗燈秋塞雨鈴柝夜溝潮士
飽爭投石農閑數舞箭毋令廢收穫高隴有枯苗

夏夜有懷

重露澄秋色輕風生夜涼碧看湖草亂紅愛渚蓮香有
弟徒相憶何人不異鄉悲笳在城上雙淚落衣裳

贈翟好問

笑爾山城隱柴門對縣衙酒資千畝苧生計一園瓜雨
步荷巾濕風吟蓆帽斜時時扶短杖看竹到東家

長沙雜詠

湘人愛樓居斜枕湘江起樓下倚闌人簪花照春水

夢綠軒

夢裏綠陰幽草画中春水人家何處江南風景鶯啼小
雨飛花

吳中行樂詞

單羅小扇夾紗衣冠子梳頭插翠薇知是范家園裏醉
無人不戴杏花歸

紅綠蕉二仕女圖

兩樹紅蕉隔禁扉曉涼攜伴試羅衣金鈴小犬迎人吠
應怪秋來出院稀

故山春日

千花萬萼委塵埃只有荼蘼獨自開應是鄰家更零落
過牆蝴蝶又飛來

遇史克敬詢故園

克敬自長洲來因詢吳中風景大異往昔賦此以寓鄉里之思

三年身不到姑蘇見說城邊柳半枯縱有蕭蕭幾株在也應啼殺樹頭烏

贈京妓宜時秀

欲唱清歌却掩襟晚風亭子落花深坐中年少休輕聽此曲先皇有賜金

到江西省看花次韻

生色屏風一面開輕羅團扇合懽裁深深院落青青柳縱是無花也看來

鯉魚山阻風天甚寒雨皆成霰

江南天氣大無憑草色煙光暖欲蒸向晚鯉魚風乍急

盡吹小雨作春冰

望武昌 二首

吹面風來杜若香離離煙柳拂鷗長人家鸚鵡洲邊住一向開門對漢陽

春風吹雨濕衣裾綠水紅妝画不如却是漢陽川上女過江來買武昌魚

祁陽道中

疎煙小雨濕流光愁得楊花不暇狂半晌春晴便飄蕩綴人簾幕上人牀

張羽 二十三首

羽字來儀以字行更字附鳳潯陽人從父宦游

江浙兵阻不得歸遂居吳興元末授安定書院
山長明初徵起廷對稱旨擢太嘗司丞兼翰林
院同掌文淵閣事以事竄嶺外未半道召還抵
京知不免自投龍江死有靜居集

張企翱云國初以
高楊張徐比唐之

四傑故老言不惟文才之似而其攸終亦不相遠者菴盈川令終如一
太史之斃同乎賓王北郭雖不溺海僅全首領而非首丘先生投龍江
又與照鄰無異噫亦異矣 王元美云張來儀徐幼文如鄉士女有質
有情而乏體度 程孟陽云靜居五言古詩學杜學韋各有神理非苟
然者歌行材力馳騁音節諧暢不襲宋元格調律詩清員渾脫不事雕
績全是唐音頡頏高楊未知前後或謂張徐不及高楊此耳食之論也
詩話來儀五古微嫌鬱轡近體亦非所長至於歌行
雄放駸駸欲度季迪前固當含超幼文跨躡孟載

春初遊戴山

雲羅橫四海田野無遺英尚賴二三子共怡山水情
煦煦新陽動寥寥天宇清昔人稱四美茲晨遂成并前登
高丘阻遙睇澄湖明憑林招遠風松檜自成聲俛仰天
地間微軀良不輕安能自羈束坐使衆累縈處賤足為
貴抱素詎非榮逍遙解神慮庶以適吾生

春山瑞靄圖

鶯啼山雨歇前川綠正繇人家在深樹雞犬晝無喧澹
澹流水意依依田父言謾鼓木蘭楫往溯桃花源即此
堪結廬可以傲華軒

立秋日早泛舟入郭

連霖啓秋期金氣晨已北溪雲合餘陰水霞相照耀登
艫泛涼颺乘流駕奔峭迴波蕩塵襟青山列遠眺蒲葦
迷森沉菱荷爭窅窕沙明衆女浣潭淨孤禽嘯端居積

百憂暫出窺衆妙好爵豈不懷衛生乃其要寄謝滄海
人如予可同調

擬過園隱阻雨

在遠每傷離在近還成隔飛雨渺無涯佳期悵難得人
寒市井空天晚江潮白知君掩閣卧終朝遲來客

金川門

兩山夾滄江拍浮若無根利石侔劔戟風濤相吐吞維
天設巨險爲今國東門試將一卒守堅若萬馬屯吾來
犯清曉天空霜露繇列宿森在列北斗峭可援江光合
海氣溟滓神攸存俯視不敢唾中有蛟龍蟠浮屠者誰
子高居凌風幡下見渡口人擾擾蠡螳誼媿彼超世士

去去將何言

李辰山云是詩作於洪武甲寅未三十
載而燕師從此入矣讀之可勝浩歎

清口

豁達兩河口前與黃河通高岸忽斗折清淮匯其中甘
羅城在南韓信城在東一爲秦人英一爲漢家雄人生
有不死所貴在立功方其未遇時鹿鹿何異同時苟
未會丈夫有固窮舍舟登高防歲暮百草空坡陀隴畝
間一二老弱翁遺跡不可問但見荒榛叢行行重回首
目斷雙飛鴻

余將軍篆書搨本歌

即忠襄
公闕也

余將軍守舒州舒州之城大如礪長江西來繞城流賊
船如雲壓城破將軍提劔城頭坐劔未動虜已奔鯨鯢

明詩總卷九
蔽江江為渾孤軍六年二百戰王師不來城自存無兵
猶足戰無食安可支豈無愛妾與愛馬殺之不解壯士
飢力盡矢竭將奚為倉皇齧舌罵不已義士千人同日
死祇今還有盡忠池碧血清冷化為水將軍持節東州
時作此篆書形崛奇妙墨已隨神物化好事當時臨得
之雖非其真意獨在垂金屈玉蟠蛟螭我拜重是忠臣
跡秦相雖古其人非嗚呼將軍此書配者誰請君摹取
浯溪石上中興碑

畫雲山歌

我昔曾遊廬岳頂欲上青天凌倒景山中白雲如白衣
片片飛落春風影雲晶晶兮花冥冥萬壑盡送洪濤聲
恍然坐我滄海上金銀樓觀空中明上清真人笑迎客
夜然桂枝煮白石手持鳳管叫雲開虎咆龍吟山月白
明發邀我升東峰導以絳節雙青童天雞先鳴海出日
赤氣照耀金芙蓉屏風九疊花茸茸霧閣雲窗千萬重
胡不置我丘壑中一朝垂翅投樊籠空留萬片雲挂在
清溪千丈之寒松愁來弄翰北窗裏貌得雲山偶相似
遂令殘夢逐秋風一夜孤飛渡江水夢亦不可到圖亦
不可傳不如早賦歸來篇山之人兮待我還安能齷齪
塵土間坐令白雲摧絕無所歸青山笑我凋朱顏

米南宮雲山歌

古之画法不復見六朝人物留遺譜後來山水出新意

二李三王差可觀洪谷之後有關荆營丘渾雄獨造古
華原處士志奇崛餘子紛紛何足數郭熙平遠疑有神
北苑爛熳皆天真画院宣和衆史集俗筆姿媚非吾倫
豈知南宮迴不羣一掃千古丹青塵神閒筆簡意自足
窈窕青山行白雲黃侯黃侯安得此元氣淋漓猶滿紙
晴窗拂拭對高秋恍忽神遊華山裏生兮画癖奈此何
爲子試作雲山歌珍藏什襲子須記世間名画今無多

李遵道墨竹歌

墨竹昉自何人始輞川石刻今餘幾後來蕭悅稍出羣
香山侍郎獨稱美洋州太守善寫真長帽先生差可擬
江南謾作金錯刀枝葉離蕪何足齒北方作者誇澹游
房山繼之妙莫比吳興公子最擅名同時亦數薊丘李
薊丘有嗣能傳家筆勢翩翩此其是一筆玉立無因依
風露淋漓猶滿紙想當塗灑發幽興靜對山僧北窗裏
江湖無人老成盡百藝荒涼今已矣展圖三歎墨君堂
秋聲滿座悲風起

唐子華雲山歌

前朝画品誰第一房山尚書趙公子二公何以能絕倫
丘壑乃自胷中起由來書画總心畫政自不在丹青裏
當時豈無劉與商屏障紛紜何足齒唐侯本是雲川秀
愛画彷彿董與李長松平遠早已工更上歙州看山水
歸來却師郭咸寧參以房山勢莫比始知絕藝老更成

庸夫俗輩那知此此圖三尺誰為贈雲氣蒼茫石塊磊
牛羊未歸樵子出戶牖寥落蒼厓底寫成不題歲月字
要是頭白居易鄉里乾坤浩蕩江海空後人未續前人死
為君題詩三歎息世上好手今餘幾烏乎尚書公子不
復見得見唐侯斯可矣

画山水行

題趙待制仲穆所画江浦歸帆
秋林瀟灑二圖沈才幹所藏也

古來名画傳父子唐有二李蜀兩黃吳興公子冠當代
雍也繼之早擅場宋祖子孫盡龍種毛骨固是非尋常
珊瑚寶玦久零落空有妙藝傳文章至元天子親召見
徒步便賜中書郎奏圖每得天顏喜盛以金匱白玉堂
遂令世人爭貴重門戶雜還如堵牆雍初騰蹕晚一蹶

五陵豪氣無時忘吳姬越娥坐相擁始肯落筆揮縑紉
五日十日一水石屏障彷彿生輝光君家雙圖何所得
私印乃出牟陵陽一圖汗漫秋水闊鴈鴻排序投瀟湘
山僧悄尋孤寺遠客子喜甚高帆張一圖律兀衆峰出
疎林葉赤天雨霜消搖巾舄者誰氏可是商顏之綺黃
風塵瀕洞二十載玉軸錦題多散亡圖書祇應天上有
人間那得千金藏從來好事多成癡雲煙過眼如毫芒
君不見王家桓家勢盡時複牆走鯨不得將何如城南
佳山水千巖萬壑摩青蒼與君對此飲美酒雖無南宮
北苑庸何傷

朱元暉雲山圖

前代幾人画山水逸品只數南宮米海嶽樓前北固山
頃刻雲煙生滿紙古云丘壑起心胃恍忽似與神靈通
素壁高懸卧清晝耳邊恍若聞松風怪底青山起毫末
森沉綠樹臨溪活仙人道士疑可招芝草琅玕俯堪掇
千里能移方寸間天機揮灑過荆關如今画史空無數
對此高蹤詎敢攀

倪元鎮画竹沈御史所藏

雲林之子有仙骨平生好潔如好色紛紛濁士等沙蟲
嗚呼瓚也何由得憶昔常登清閟堂鵲尾爐蕪龍涎香
紹京妙墨僧繇画示我不啻千明璫人間萬事如飛電
洗玉池空人不見季子城東土一坏何人為著黔婁傳
繡衣使者騎青驄曾聽竹枝湘水東歸來見此若夢寐
巴陵洞庭生眼中江湖豪翰今零落君得此圖良勿薄
媿我題詩憶故人黃鶴題詩下寥廓

錢舜舉溪岸圖

憶昔至元全盛日天子詔下徵遺逸吳興八俊皆奇才
秀邸王孫稱第一一朝玉馬去朝周諸子聲名總輝赫
豈知錢郎節獨苦老作画師頭雪白江南没骨傳者希
錢也得法誇精奇晴窗點染弄顏色得錢沽酒不復疑
今人祇知重花鳥豈識此圖奪天巧玄雲抱石雷雨垂
蒼山夾水龍蛇遶岸側溪回共杳冥蒲稗深沉映魚鳥
漁舟乍隨遠煙散客子競渡澄江曉白云布置師北苑

只恐庸工未深了卷餘更有魏公題字擬鍾王差未老
鄭侯得之恐神授使我一見喜絕倒雙溪流水清何極
城外南山空黛色文章翰墨何代無二子儔能躡其迹
為君題詩三歎息於乎古人難再得

胡廷暉画

画師我識吳興胡身長八尺蒼髯須目光至老炯不枯
藻繪萬象窮錙銖大兒十歲能操觚小兒五歲能含朱
得錢但供酒家需時復縱博為歡娛魏公家藏摘瓜圖
妙筆奚翅千明珠胡一見之神頓蘇以指畫肚潛臨摹
落筆便與前人俱祝融撐空閣道孤朝雲暮雨相縈紆
中天碧瓦仙人廬下有桃源風景殊雞犬似是先秦餘

潯陽野客山澤臞自從喪亂遭窮塗幸逢治世容微軀

堯舜亦有巢由徒已辦小艇長鬚奴便欲往從漁父漁

江湖此境何地無

趙文敏公家藏小李將軍摘瓜圖歷代寶之常倩廷暉全補暉私記其筆意歸寫一幅質公公大驚賞謂其亂

真由此名實俱進故詩及之

青弁雲林圖

前代何人画山水長安關仝營丘李華原特起范中立
三子相望古莫比亦有北苑與河陽後來作者誰能當
米家小虎出逸品力挽元氣歸蒼茫房山尚書初事米
晚自名家稱絕美藝高一代誰頡頏只數吳興趙公子
當時弭節匡廬峰曾寫太平興國之神宮五峰却立疑
爭雄臺殿突兀紛青紅中有雲氣隨游龍我對此圖卧

三日遂令奇氣生心曾亂來學士遭漂蕩文藝草草誰
能工筆精墨妙心更苦那得再有前賢風於乎乾坤浩
蕩江海闊使我執筆將安從

莘叔耕画梅雪軒

自注叔耕名野世
居湖州蓮花莊

好畫誰如莘棗強墮馬折肱猶未忘何年寫此寒林趣
精絕未數左手王屋裏何人坐吹笛似是南昌郡中客
曲終朔雪忽飛來開門滿樹梅花白

贈琴士

有客夜半來山中橫琴坐石彈松風松風曲罷抱琴去
落月一聲天外鴻

聽老者理琵琶

老來絃索久相違心事雖存指力微莫更重彈白翎雀
如今座上北人稀

取勝亭感舊

細雨微消紫陌塵湖光冷落似無春朱門記得曾游處
楊柳青青不見人

寄天目山雍長老

天目之山青岵堯道人縛屋青山極白雲出山不歸去
春風吹老黃精苗

燕山春暮

金水橋邊蜀鳥啼玉泉山下柳花飛江南江北三千里
愁絕春歸客未歸

徐 賁 二十七首

賁字幼文其先蜀人徙居吳淮張開閩辟為屬
避去之吳興隱蜀山中洪武初用薦授給事中
改監察御史出按廣東改刑部主事陞廣西參
政遷河南左布政使尋下獄死有北郭集

王元美云方伯

體裁精密情喻幽深頗似錢郎 顧玄言云方伯詞采道麗風韻淒朗 殆如楚客叢蘭湘君芳杜每多惆悵

編謂幼文以丙辰起家其卒以癸酉七月予考洪武六年癸丑幼文與 呂志學宿蜀山書舍為志學作画次年甲寅衍師過佛慧精舍題此画 云幼文仕於朝季迪已登鬼錄則幼文以甲寅入朝非丙辰也庚申七 月志學題幼文画云幼文已矣而画獨存則幼文之死於獄當在己未 庚申間非癸酉也載觀高張二集高有答余新鄭詩云君初隨例詣闕 下有旨謫徙鍾離城異鄉何人恤患難喜有楊子兼徐卿去年聖恩念 逐客特賜收拭加朝纓初春天子下明詔辭謝不得來南京楊即孟載 也余則永嘉余堯臣北郭十友之一蓋三人同受淮張辟為掾屬吳亡 例謫臨濠洪武二年放歸余主新鄭簿楊知榮陽縣徐未知何官當亦 此時銓授而季迪微修元史正在南京得相贈答也楊有夢綠軒詩序

云予與徐君幼文同謫鍾離結屋四楹幼文居東楹子居西楹詩云去
年吳城正酣戰却倚危樓望蔥蒨今年放逐到長淮萬綠時於夢中見
則楊徐謫濠在吳亡之次年其赦除在洪武二年歷歷可考而張習以
為吳亡後幼文隱居蜀山洪武七年用薦起家習自謂得諸故老傳聞
其入朝死獄之年
一一舛誤何與

詩話呂志學題幼文所画山水圖謂肆筆瀟灑清潤而帶書法於詩亦
然才氣方之高楊張三君稍為未逮然詩法若然森有紀律長篇險韻
極其熨帖頗有類皮陸者張來儀先從吳移居戴山以詩招幼文云吳
興好山水子我盍遷居繞郭羣峰列迴波一鏡如蠶餘即宜稼樵罷亦
堪漁結屋雲林下殘年共讀書幼
文乃移居蜀山兩山蓋相望也

猛虎行

爾虎從何來據住三叉口昨日啖東家豬今日噬西家
狗山中百獸不敢鳴白楊黃竹陰風生鄰家少年憑意
氣彎弓挂箭巡山行夜深月黑候虎出明朝荒草餘白
骨

農父謠送顧明府由吳邑陞常熟

我家茅屋臨官道前種桑麻後黎棗年年力作不違時
人有餘糧牛有草官長下車今五年老身不到州縣前
鄉無吏胥門戶靜家家盡稱官長賢大男入郭買田具
始知官長移官去來時憶向官道迎今日去時須送迎
攀轅欲留留不止我民倉皇彼民喜殷勤再拜官道旁
願飲三江一杯水

柳短短送陳舜道

柳短短春江滿蘭渚雪融香東風釀春暖山長水更遙
浩蕩木蘭橈蘭橈向何處送君南昌去離愁落日煙中
樹

白蘋花送王汝器

白蘋花綠蘼草南風吹碧波五月湘江道行人勸酒離
緒多櫂女櫂郎歌櫂歌黃鸝啼時風景好大堤日落奈
君何君今去不可留山疊疊水悠悠

八月十五夜飲王擴相川別業得動字

風高海雲收月出天宇空今日寒暑均適與諸君共懽
深坐忘永契合飲易痛露螢寒不飛水鳥夜停唳山精
各潛匿銀蟾忽飛動亭亭廣寒桂不知何年種我欲問
嫦娥素鸞無由控佳節屢變更壯心久恹恹人生非仙
骨有樂當自縱惜無桓伊笛爲爾作三弄

過荷葉浦

粼粼水溶春澹澹烟銷午不見唱歌人空來荷葉浦無
處寄相思停舟采芳杜

尹明府吳越兩山亭

長江接海門一水限吳越兩山鬱相對峰巒各羅列勁
勢爭吐吞蒸嵐互出沒尹君好游觀結亭山水窟闌干
出層巔細路縈百折崩石絡垂蘿老樹著棲鶻平生登
臨興盡爲山水發不知嘗膽人此地幾征伐至今兩山
雲來往似奔突嗟余客江海所歷多奇絕何當上斯亭
長歌弔遺烈

簷簾軒

小軒閔幽寂迴闌碧筠護寒色晴裊池垂梢晚縈露陰
凝訝煙積籟起知颺度瑟瑟含夕清蕭蕭澹秋素不有
虛心人何由同歲暮

菜邁爲永嘉余唐卿右司賦

遠辭華蓋居來卜山陰宅乍到俗未諳久住地旋闢屋
廬尚朴純楹桷謝雕飾高營踞山跗深甃逗泉脈檐將
狼尾苦門用鼠筦織缺垣唯補蘿圮砌總蒙藹編籬限
邇鄰封枿表殊場本來是野性豈是耽地僻學圃欲擬
樊爲功敢侔稷寧惜勞外形自甘食餘力耕鋤限兒課
灌溉當僕役破塊何昉昉陳器亦畎畎駕許俗士回屐
向鄰翁借筐筥織湘材鋏鍤鑄棠液卓饗鷹觜利負蓑
蝟毛磔俯仰疲枯槔沾灑漬襍襖循畦行策鏡偃林卧

敲石鑿披欲芟丘刈削竟驅礫值阜即為坡遇凹就成
洫堤崩防密葭竇隙拒亂棘地同農畝計區學井田畫
長畛縱復橫曲渠廣還窄接流引餘清疏沼匯深碧架
桁秋實垂籬落夏蔓幕雨露加膏腴糞土發磽瘠識種
題裏藏辨類分行植時法常按譜候時即看曆蕨芽拳
握紫薑檠拇駢赤兩合憐薊孳叢生愛鉞芑初菴迸蟄
雷新臺長春菽雀弁菘葉峨馬帚莖直黃繁微颯縣
瓠老枯辦拆芍苗卷龍鬚藥幹擁牛膝黃獨雪晴收紫
纂露晞摘陰階茂蕨芘下田豐菲蕙卷輪木耳垂攢刺
菱角射秋茄采更稀夜韭剪仍殖芝芳凝海瓊芡鬱點
池墨枸杞香可醪竹筍熟堪腊石皮被柔薄土酥膾肥
葍細蓴入饌鱸鮮萋雜羹鯽茶苦檠與儔菘脆冰為敵
筍櫨西蜀致苜蓿大宛得長縈苻帶流亂簇陳絲繹芹
效野人獻瓜為天子副決明纔一方蒿苳連數席瑤縻
慰渴心玉延起羸疾葍毒笑非喜芥辛泣詎戚盤根芽
蕕壤脫穎笋穿壁擷香憐雞蘇折甘嗜燕麥粟腐切方
圭乳餅斲員辟孕子梭受剗贅聃石被馘兔目淘夏槐
鹿角芼臘炙菁託諸葛呼巢以元修斥諸葛元修
二菜名莧褻蔡
守清薇怨周節逆邪蒿義所攘穢萎理堪啞薄利嘉拔
葵省謗惡遺蕙窮餐蘘酸黃儉啖薤留白閑情付田園
生意仰膏澤莢齊翠疑剪甲坼綠訝擘掩冉煙際姿蔥
蓊雨餘色始掇惜滓染載滌畏蟲螫新薦或在邊薄湘

亦須鬲求久漸投醪致爽遽沃醴不煩僚友送敬向先
聖釋對屠誇大嚼燕客忻小摘拌羞不過二甕菹當飲
百未能著蔬經安敢踰食籍旨蓄足山厨素供過香積
用茲卒歲年庶得勤朝夕賓魏徐見厭厄陳顏自懌潔
畚上恥污造橋盜懷恤抱甕忿設機授書誚求益用侯君房徵嚴
光事縱馬因致憂吞蛭遂亡謫萬錢柳復乞片金華還擲
仕知呂姪妄居味鄭人識枕肱仲尼樂傷指范宣扼鼎
臍固云嘉食單亦足適敷淡分所安堪味欲易極毋因
口體累遂使愆民德

登戴山

在湖州臨湖門外二十里

千田渺空曠孤岡忽高峙新松蔭其巔白石繚其趾初

登若蘄絕稍上乃如砥亭亭日晷側肅肅征鴻駛南拓
天目雲北覽具區水比來局羈絆遊遨喜茲始同心良
可重懽言得佳士非惟外累遺沉憂亦成委薄暮聊旋
歸餘興會留此

種菊

蕭條齋舍前隙地頗高爽茲焉倦耘鋤而乃成廢壤邇
來學種竹始為驅草莽掩苒籬落間枝葉紛以長雖煩
灌溉勤亦藉雨露養秋香固所悅晚節益可仰匪曰表
隱名聊以備幽賞

荆山

荆山揭高厓塗山聳橫壑長淮出兩間中斷見斧鑿於

馬東洪流浪起石鬪角誰能為此功在昔大禹作至今
遺廟存香火乃寂寞我來問邑人往事竟緬邈於時春
正深草木尚荒落登臨欲開襟覩茲反不樂

壽州

舟行夜達曙路入破石口平山帶孤城一塔起高阜問
知古壽春地經百戰後羣孽當倡亂受禍此為首彼時
土產民十無一二有田野滿蒿萊無復識畎畝去程不
可稽欲望敢遲久

潁川

客程不論遠所求在陰晦惡風滿川來雨勢晚逾倍船
爭急流上寸進還尺退枯葭夾崩沙路轉數百匯颯颯
孤篷飛琅琅萬珠碎篙師左右呼坐客默與對去心雖
云迫前途苦茫昧德星無後覩洗耳亦何在有懷仰高
風令人發深慨

盤子城

前登盤子城山隘勢欲迫路迴土峭絕傍夾千仞壁石
狀如矩斲巨細總方直無泉土脈死草木盡改色高巔
有堡障重門閉重棘陰慘行人險惡意叵測信知狐
鼠輩得在此中匿我生好壯觀努力更攀陟立久日將
晡浮雲渺鄉國

天井關

峰迴抱深壑下視天鑿井昔人建重關扼險備邊警鍵

鑰久已絕垣石尚森整峨峨尼父祠門掩衆山靜曾聞
此回轍無復過斯境詢知鄉老言此事古未省餘氓數
家在破屋暮煙冷我行力稍疲景物不暇領且為投宿
來驚風夜愁永

渡沁

陸行長苦渴今渡沁河水奔騰走百灘聲遠聞數里我
來坐其涯肩擔欣暫弛不意山塢間偶得見清泚連朝
塵沙目豁爾淨如洗雖云倦行力對此亦足喜南風吹
青蒲白鷗忽飛起

沁水縣

一水隨山根宛轉流出迴灘聲繞縣門孤城數家靜風
土殊可怪十人五生癭土屋響牛鐸壁滿殘日景行遲
欲問宿連戶皆莫肯亭長獨見留半榻亦多幸呼童此
晚炊糲飯穀帶穎野藪不可得敢望肉與餅塗行乃至
此儉素當自省

太陰山

巍巍太陰山厓壁拔嶄峭積水嵌層墟凜若太古造凍
深草木堅僵立勢難撓高寒橫障空陽景未嘗到鄰有
羲和墓欲問莫可弔如何於此地獨不被臨照至今山
中烏性莫識晴昊聊為志其事因之發長笑

女媧墓

空山兩高冢媧皇此中葬焦土積層巘勢助殿閣壯大

日言紀卷九
哉補天手功出千古上至今鍊餘石火氣夜猶放轟雷
常被護烈風日掀蕩陰林慘可畏怪木高數丈百鳥飛
繞枝欲止不敢向地靈氣所鍾祭禱土人仰經過謁祠
下幸獲拜神像

霍山

霍山古北鎮勢尊出羣麓山深異風景春盡樹未綠居
人苦多寒鑿土為住屋屋頂土元厚亦種麻與菽乃知
此方民猶有上古俗我欲拜其廟日斜去程促窰煙斂
暝色牛羊半歸牧徂塗多嶮巖村館早尋宿

兵後過畢亭山

畢亭西去遠一過一淒然鴈宿蘆中月人歸草際煙漁
家多近水戎壘半侵田尚喜餘民在停舟問昔年

送曾伯滋赴西河將幕

上將初分閫儒官解習兵風旗春獵野雪帳夜歸營洮
水從岷下祈山入隴平知公能載筆草檄報邊聲

送朱知事

惆悵官亭酒如何送客頻尊前莫催別明日異鄉人

送呂庸南

雪色上征衣雲沙鴈自飛去家千萬里只解送人歸

送別沈德虔

江聲千里萬里客路長亭短亭後夜相思何處蘆花明
月沙汀

送張景則歸天台

浙江東去有名山路遠天台
鴈宕間我未得遊空悵望
是君鄉里喜君還

明詩綜卷九

明詩綜卷十

小長蘆 朱彝尊 錄

長水 杜庭珠 緝評

余堯臣 一首

堯臣字唐卿永嘉人元末自會稽入吳明初謫

濠放還授新鄭丞有菜藹集

錢受之云唐卿居會稽越鎮帥邁善卿參政呂珍羅

致幕下有保越之功無意仕進於越之桐桂里治圃結茆署曰菜藹已而入吳居北郭與里中楊基張羽徐貴王行王彝宗克呂敏陳則釋道衍為高啓十友洪武二年授新鄭丞見於啓詩其曰司馬曰左司必東越鎮將版授之職銜而今不可考矣

靜志居詩話高季迪春日懷十友詩於余司馬堯臣云列戟衛嚴關應無休沐暇夜飲余左司宅云燈銷月窺闌角露霜委砌苔余左司沈別駕元夕會飲城南詩云故人念我有二子省內郎官府中佐徐幼文菜藹詩題為永嘉余唐卿左司賦然則左司之稱本於越鎮將版授而司馬之銜疑唐卿曾仕於淮張也

秀野軒

濕翠浮草芽空青散木杪輕舟理橫塘歸人渡清曉棲
鴉返故巢潛鱗濯新藻倒景澹斜暉迴飈蕩晴昊衡門
夜不扃燕坐事幽討落葉秋自飄殘花春嬾掃我欲往
從之稅駕苦未早揮手謝孤雲去去沒蒼徼

王行 三首

行字止仲長洲人洪武初為郡庠經師藍玉延

教其子連坐誅有半軒楮園二集

徐子元云行詩清雅第不及高楊

詩話止仲好談兵游都門人或尼之笑曰虎穴中好休息也既就涼國西塾數以兵法說涼國涼國卒用是敗平居於十友中最契道衍謂之序曰上人非若他人事佛奉師碌碌作沙門者今天下亂已極且必治治然後出於時以發其所蘊其上人之志與當世之人安知終無與上人同其志者蓋姑有所待也誦其言亦傾危之士乎至墓銘舉例一書足為學文者津筏詩非所長也

題趙元臨高房山鍾觀圖

北苑貌山水見墨不見筆繼者惟巨然筆從墨間出南
宮實遊戲父子並超軼高侯生古燕下筆蛻凡骨泐泐
水墨中探破造化窟嘗圖得鍾觀景象照雲日長松映
飛泉霞采互飄歟今朝見茲畫臨寫意無失慘澹入窈
冥稜嶒隔岑蔚高堂時一舒六月氣蕭瑟平生丘壑性
塵空欣已拂因之興我懷山中斲苓朮

趙吳興淵明像并書歸去來辭

後更畫竹石

虛館坐清曉高秋零露時佳菊秀可餐墨葩含晚滋芳
馨發孤思寫此歸來辭餘興猶未已寒玉生疎枝孰謂
公子懷不與幽人期撫卷三歎息繫年非義熙

房山寒江孤島圖

千山萬山重復重畫力筆力鬪奇雄青紅蒼翠滿縑素
缺處淺碧分遙峰歷觀畫史每如是意謂此法由來同
昨嘗凌秋潮揚子一舸縹緲乘長風洪波吞天杳無際
出沒但有孤輪紅乃知山水有佳處到此始覺塵埃空
當時海岳應飽見落墨便自超凡庸不將層壘競工巧
遂使氣象齊鴻濛平生愛画惟愛此苦恨妙法無能攻
九州之表有人物意象獨數房山翁茲圖咫尺便千里
小米大米追高蹤愛之歌詠乃常理濡翰自媿言非工
詩成忽復三歎息矯首長望青冥鴻

宋 克 一首

克字仲温吳人明初徵為侍書出為鳳翔府同知

詩話仲温任俠自喜挾彈走馬學握奇陣法張氏據吳欲致不得闔門却掃工草隸書祝京兆評其書法天授而高侍郎為作南宮生傳盛譽其詩侍郎又有酬宋軍諾見寄詩云少為鬪雞兒鮮裘奮春明走馬出飛彈撇揆誇身輕氣服諸俠徒不倚父與兄落花錦坊南美人理妝迎酒酣迸五木脫帽呼輸贏及壯家已破狂游恥無成遂尋鬼谷師從之學言兵業成事燕將遠戍三關營奇勛竟難圖迴臨石頭城覽時識禍機不因憶萼羹飄然別戎府震澤還東征恥戈薦辟書傲然捐公卿知音竟為誰四海嗟惇惇又答仲温見寄詩云念昔文翰場弱蹤繼清塵鳴絃東閣夜飛蓋西園晨誦之可得其行槩矣惜其詩集罕傳也

秋日懷兄弟

相別幾多時相思淚滿衣家貧經難久世亂得書稀作
史余誠拙從軍事亦非鄉心秋塞鴈盡日向南飛

呂 敏 一首

敏字志學無錫人元末為道士洪武初官無錫縣學教諭有無礙居士集

書雲林畫林亭遠岫

憶過梁谿宅于今二十年賦詩清閔閣試茗惠山泉夜雨牽離夢春雲黯遠天鄉情與離思看畫共茫然

陳則一首

則字文度崑山人洪武六年以秀才舉任應天府治中俄進戶部侍郎謫大同府同知遷知府

錢受之云文度文詞清麗元季僦屋授徒以工詩名於吳下高啓北郭十友之一也

題雲林畫

落花愁殺未歸人亂後思家夢更頻縱有溪頭茆屋在

也應芳草閉深春

孫蕢二十首

蕢字仲衍南海人洪武中授工部織染局使出

為虹縣主簿選入為翰林典籍復外補平原主

簿罷歸尋除蘇州府經歷謫遼東坐黨禍死有

西菴集

黃才伯云仲衍詩初若不經意而氣象雄渾與喻深致駸駸乎魏晉之風徐子元云嶺南五先生惟仲衍清圓流

麗如明珠走盤不能自定彥舉雄俊豐麗殆敵手也王元美云孫仲衍如豪富兒郎入少年場輕脫自好歐楨伯云明興五嶺以南五先生起軼視吳中四傑李時遠云仲衍豪邁瑋麗足追作者其七言古

體不讓唐人葉處元云先生五七言古風雖唐人不能遠過曹潔躬云仲衍善言風景於廣州則云丹荔枇杷火齊山素馨茉莉天香國

於羅浮則云菰極房權倚日開蕊珠樓閣中天起於雲南則云蠻官見客花布襖邨婦背鹽青竹籃於武昌則云武昌城頭黃鶴樓飛檐遠映

鸚鵡洲漢陽樹白煙景濕行人如鷗沙際立使未至其地者誦之亦當神往若酒徒散落黃金空獨臥第檐夜深雨松花酒熟人不歸瑤草東

風幾回碧風韻不減唐人他如荒蘿遶屋秋夜涼山鬼吹燈冷光濕興

闌移席傷寒梅雙眼如貓對
花碧亦不失為韓冬郎語也

詩話自黃以下世所稱南園五先生也仲衍才調傑出四人五古遠師
漢魏近體亦不失唐音歌行尤琳琅可誦微嫌絲縛耳集句亦工若秋
水為神玉為骨芙蓉如面柳如眉遠籬野菜飛黃蝶糝徑楊花鋪白瓊
去日漸多來日少別時容易見時難三湘愁鬢逢秋色半壁殘燈照病
容野草怕霜霜怕日月光如水如天鶴羣長遠三珠樹花氣渾如百
和香可稱巧合繼之者如桂嶺瘴來雲似墨蜀江風澹水如羅風塵在
苒音書絕人物蕭條市井空歸目併隨回雁盡離魂潛逐杜鵑飛長疑
好事皆虛事道是無情却有情綠水青山雖似舊紅顏白髮遞相催此
廬陵李楨昌祺所集也如眼前好惡那能定夢裏輸贏總不真東澗
水流西澗水錦江春似曲江春雲收雨散知何處燕語鶯啼亦可傷千
里關山千里夢一番風雨一番啼慘慘悽悽仍滴滴霏霏拂拂又迢迢
此瓊州丘濬仲深所集也如文章宇宙千年事江漢風流萬古情老去
詩篇渾漫與晚來幽獨轉傷神欲知世掌絲綸美肯信吾兼吏隱名縱
飲欲謀良夜醉殊方又喜故人來乘舟取醉非難事送客逢春可自由
登第往年同座主抱琴何處覓知音疎檐看織蠶蛸網遠信閒封豆蔻
花四海交游更聚散十年京洛共風塵漫說簡書催物役猶將談笑出
風塵未央樹色春中見茂苑鶯聲雨後新自歎馬卿常帶病也知光祿
最能詩春浮玉藻寒波落水滴銅龍晝漏長佳節每從愁裏過遠書忽
向病中開江淹采筆空題恨荀令香爐可待熏小院迴廊春寂寂北湖
南隸水漫漫動于世上明開眼莫怪先生懶折腰苦節難違天子命夢

歸偏動故鄉情舉世盡從愁裏老暮年初信夢中忙酒酣嬾舞誰相拽
客至從嗔不出迎緩帶輕裘成昨夢濁醪麪飯任吾年古來賢達知多
少舊日人民果是非新結草廬招隱逸便應黃髮老漁樵合歡却笑千
年事奉使虛隨八月查復有樓臺銜暮景但將懷抱醉春風故國山川
皆夢寐昔年親友半彫零此長沙李東陽賓之所集也如病身最覺風
露早離夢杳如關塞長此休寧程敏政克勤所集也如一臥滄江驚歲
晚千家山郭靜朝暉嗜酒何妨陶靖節能詩重見謝玄暉此吳江周用
行之所集也如坐看蕉葉題詩句醉折花枝當酒籌閻闔迴臨黃道正
樓臺直與紫微連東風已綠瀛洲草閣道迴看上苑花五夜漏聲催曉
箭千門曙色鎖寒梅雲生紫殿幡花濕月射珠光貝闕寒深院沈沈人
悄悄春風澹澹影悠悠笙歌縹緲虛空裏臺榭參差煙霧中小院迴廊
春寂寂前峰後嶺碧濛濛離岸游魚逢浪返出林幽鳥向人飛雲開日
月臨青瑣花擁絃歌咽画樓晴雲滿戶團圓蓋瀑水侵階濺舞衣此錢
塘沈行履道所集也如念我能書數字至似君須向古人求此上海陸
深子淵所集也如卿月夜臨仙掌動御煙曾見袞龍浮風煙迸起思鄉
夢霄漢長懸捧日心病眼較來猶斷酒新詩改罷自長吟江清露白芙
蓉死雲散天高秋月明蘄竹水翻臺榭濕桐花風軟管絃清胡蝶夢中
家萬里鳳皇聲裏住三年愁將玉笛傳遺恨暗擲金錢卜遠人路遶寒
山人獨去江涵秋影鴈初飛陶令久辭彭澤縣山翁長醉習家池虛心
願比郎官筆感興平吟才子詩漠漠稻花資旅食輕輕柳絮點人衣老
妻畫紙為碁局童子開軒掃落花細水浮花歸別澗西風落葉掩重門
鳥啼深樹斷靈藥馬飲春泉蹋淺沙日落遠波驚宿鴈月明芳戍起啼

鴉共歡天意同人意多說明年是稔年倦客閉門三日雨野橋流水一
 犁煙侯門不把馮驩劍客路空攜范蠡圖暮雨自歸山悄悄高樓獨上
 思依依閒尋古寺消晴日却聽疎鐘憶翠微日暮酒醒人已遠鳥啼花
 落水空流清風未許重攜手好月那堪獨上樓魚躍鏡中將綠破鳥還
 天外帶青來過橋樹葉邨邊合隔岸柴門竹裏開碎心雨夜重檐溜滑
 足春融一徑泥此廣州張績所集也如故里春光榮書錦上林晴
 日絢朝衣莫言海上渾無地應是壺中別有家紅樹枝頭聞犬吠寒山
 影裏見人家溪邊瑤草含朝露天上珠簾卷曙霞鳥啼雲竇仙巖靜樹
 入天台石路新臺上鳳簫秦弄玉鏡中珠翠李夫人閒愁却恐驚巢燕
 往事應須問塞鴻楊柳亭臺凝晚翠芙蓉簾幕扇秋紅醉依華屋春多
 麗貴想豪家月最明天上吹笙王子晉雲邊度曲許飛瓊淚殘秋雨遺
 塵鞮腸斷春風為玉簫蝶粉亂翻迎笑臉柳絲輕舞學纖腰恍疑瓊鳥
 翻成夢只是長安不見人別酒不須花底勸淚痕時倚枕函流看花誰
 與同攜手好月那堪獨上樓望斷鴛鴦猶未見可憐蜂蝶却先知石窗
 花落春歸處山店燈殘夢到時好夢肯隨胡蝶去離魂暗逐杜鵑飛三
 春景色佳期誤半夜雨聲前計非遶砌寒風號絡緯閉門疎雨落梧桐
 狂客漫歌金縷曲佳人猶舞越羅衣紅樹暗藏殷浩宅青山空遶仲宣
 樓那堪往事空牢落誰共芳樽話唱酬此姑孰夏宏仲寬所集也如山
 橫改國三年別江至潯陽九派分兩岸蘆花飛曉雪幾家松火隔秋雲
 迢迢霽野雲陰合浙浙疎簾雨氣通風月無情人暗換江山有待我重
 來九重霄漢天將近萬轉雲山路更賒武帝祠前雲欲散胡公陂上日
 初低此安成王佩所集也如碧落有情空悵望春山無伴獨相求

山中習靜觀朝權洞口經春長薜蘿啼鳥歇時山寂寂寒鴉飛盡水悠
 悠人生有酒須當醉世上浮名好是閒嶺樹重遮千里目故人那惜一
 行書此海鹽朱朴元素所集也如柴扉茆屋無人問斷岸寒流到底清
 歸鳥各尋芳樹去寒潮唯帶夕陽還花開花謝常如此船去船來自不
 停流水白雲常在晚山秋樹獨徘徊茶煙漁火遙如画江水雲山杳
 莫窮此金華童瑋廷瑞所集也如萬里悲秋長作客一官羈絆實藏身
 止崑山方鵬時舉所集也如鱸魚正美不歸去瘦馬獨吟真可哀梁間
 燕子聞長歎樓上花枝笑獨眠勸君更盡一杯酒與爾同消萬古愁此
 蜀中安磐公石所集也如霜彫碧樹作錦樹色過樓亭又草亭諸葛大
 名垂宇宙元戎小隊出郊坰殘花爛熳開何益妙舞逶迤夜未休鍾鼎
 山林各天性風流儒雅亦吾師已聞童子騎青竹喚取佳人舞繡筵休
 怪兒童延俗客不勞鐘鼓報新晴病軀動覓藜牀坐嬾性從來水竹居
 庾信羅含皆有宅李陵蘇武是吾師煙絲碧草萋萋長雨裏紅蕖冉冉
 香萬里相逢貪握手百年多病獨登臺此香山黃佐才伯所集也如歸
 信幾番勞遠夢愁心一倍長離憂自願勤勞甘百戰莫將成敗論三分
 此戴天錫維壽所集也如長疑好事皆虛事莫遣佳期竟後期素柰忽
 開西子面芙蓉不及美人妝徒勞掩淚傷紅粉但惜流塵暗洞房此劉
 芳節聖達所集也如世態炎涼隨節序人情翻覆似波瀾笛怨柳營煙
 漠漠馬嘶山店雨濛濛綠樹碧檐相掩映游絲舞蝶共徘徊人世幾回
 傷往事愁心一倍長離憂浮生已悟莊生夢末路虛彈貢禹冠敗葉殘
 蟬連漢苑古煙高木隔棉州五千里外三年客一寸心中萬斛愁返照
 入江翻石壁疎松隔水奏笙簧鳥下綠蕪秦苑夕雲凝碧樹渚官秋此

莆田陳言于庭所集也如念我能書數字至悲君已是十年流新添水
檻供垂釣許坐層軒數散愁此廣州黎民表惟敬所集也如衰草夕陽
江上路漁歌樵唱水邊邨一樽春釀蒲萄綠滿甕秋香竹葉青僧歸黃
葉林邊寺人候夕陽江上舟此

柱客凡今誰是出羣雄因知貧病人須棄不露文章世已驚逐客雖皆
萬里去雄豪復遣五陵知獨當省署開文苑未有涓埃荅聖朝天子亦
應厭奔走諸公何以荅昇平深山大澤龍蛇遠古木蒼藤日月昏此關
中南師仲子興所集也如天下何曾有山水老夫不出長蓬蒿此南海
陳子壯秋濤所集也如朝雲暮雨連天暗野草間花滿地愁蘭亭舊路
雖曾識子夜新歌遂不傳自歎馬卿長帶病何曾宋玉解招魂追思往
事咨嗟久始覺空門氣味長瑤臺絳節游俱遍粉壁紅妝畫不成碧落
有情應悵望白雲何處更相期鶯憐勝事啼空巷蟬曳殘聲過別枝大
抵好花終易落爭教紅粉不成灰天長地久有時盡物在人亡無見期
疎檐看織蠶蛸網古木惟多鳥雀聲去日已多來日少他生未卜此生
休珊瑚枕上千行淚白玉壺中一片冰不堪紅葉青苔地早是傷春夢
雨天更恨香魂不相遇真成薄命久尋思碧莎裳下攜詩草楊柳洲邊
載酒船春蠶到死絲方盡古柏重生枝亦乾此秀水沈德符景倩所集
也如孤權夷猶期獨往崇山瘴癘不堪聞漫說簡書催物役可堪風景
促流年津樓故市生荒草落日深山哭杜鵑幸與野人俱散誕不嫌門
徑是漁樵此萊陽姜埰如農所集也如早春重引江湖興懶性從來水
竹居千樹桃花萬年藥半池秋水一房山側身天地更懷古獨立蒼茫
自詠詩天下何曾有山水人間豈不是神仙王侯第宅皆新主富貴榮

華能幾時閉戶著書多歲月揮毫落紙如雲煙莫愁前路無知己幾處
蠻家是主人漢家城闕如天上武帝旌旗在眼中此嘉興周質青士所
集也如芳草有情能下淚野花無語自生愁關門令尹誰相識江上漁
翁未易名一曲正愁江上笛十年如見夢中花世人不識東方朔谷口
空稱鄭子真獨在異鄉為異客自憐長病與長貧那知白髮偏能長莫
遣黃金漫作堆為客馬卿真寂寞依劉王粲本淒涼坐中醉客延醒客
鏡裏今年老去年樹影悠悠花悄悄江籬漠漠荇田田中郎有女誰堪
託伯道無兒最可憐仙人有待乘黃鶴壯士徒令感白虹啼鳥歇時山
寂寂寒鴉飛盡水悠悠羞將短髮還吹帽共踏清歌又舉尊江上暮鴻
遙送影湖南春草但相思蒼山迢遞成千里明月何曾是兩鄉千里雲
山何處好十年書劍總堪憐波生野水鴈初落風靜寒塘花正開獨坐
黃昏誰是伴每逢佳節倍思親共說陳琳工奏記焉知李廣不封侯水
浮花片知仙路草帶泥痕過鹿羣晚景莫追窗外驥銷憂已辦酒中蛇
此蘭谿胡山天岫所集也予叔父芾園先生亦雅好集句客至觴行恒
舉數聯坐客服其工綴予所記憶者如細推物理須行樂高視乾坤又
可愁庾信羅含皆有宅伏波橫海舊登壇蕭何只解追韓信賈誼何須
甲屈平料得也應憐宋玉不知何處弔湘君能將忙事成閒事不薄今
人愛古人豈有白衣來剝啄便應黃髮老漁樵閣中帝子今何在河上
仙翁去不回頭眺詩篇韓信鐵老萊衣服戴顛家笑拈霜管題詩句閒
向春風倒酒餅野廟向江春寂寂殘燈無皎影幢幢滕王高閣臨江渚
漢主離宮接露臺壺觴須就陶彭澤勳業終歸馬伏波皆
極自然陸務觀所云火龍瀟灑手非補綴百家衣者比也

擬古

三首

岐路一尊酒送君今遠行交持未及竟絲管激哀聲冉
冉歲華暮悠悠雲氣征馳車戒往路惻惻傷我情我情
默已傷歡愛不可忘昔為春花妍今為秋草芳秋草芳
有時夫君見無期獨宿坐長夜淚落如縷縻白日儻回
照孤懷君所知

華月散高樹列曜何參差流光射結綺思婦慘中闈良
人涉遠道感歎夜何其清聲發妙曲宛轉有餘哀妙曲
固可聽餘哀知為誰春至桃李妍歲暮華色衰居然獨
處廓顧影久徘徊

離離谷中樹燦燦春華芳枝葉何盛茂忽然隨風揚流
光有彫換物理安可常擾擾路傍子哀歌使我傷杪秋
天氣肅白露結嚴霜攬衣不能寐起視夜何長明月出
東壁衆星羅縱橫歲暮鷓鴣鳴百草青自黃遠道者誰
子驅車登太行太行鬱嵯我天路無津梁興言念同志
涕下霑我裳

寄琪林黃道士

雨絕天景佳前榮樹光綠遙憐採芝侶遠在春山曲琴
歌久已斷酒賦何由續有約今夕同開樽埽茆屋

湖州樂

湖州溪水穿城郭傍水人家起樓閣春風垂柳綠軒窗
細雨飛花濕簾幕四月五月南風來當門處處芰荷開

吳姬畫舫小於斛蕩槳出城沿月回菰蒲浪深迷白紵
有時隔花聞笑語鯉魚風起燕飛斜菱歌聲入鴛鴦渚

白雲山

白雲山下春光早少年冶游風景好載酒秦陀避暑宮
蹋青劉鋹呼鑿道木棉花落鷓鴣啼朝漢臺前日未西
歌罷美人簪茉莉飲闌穉子唱銅鞮絲華往似東流水
昔時少年今老矣荔子楊梅幾度紅柴門寂寂秋風裏
送何都閩濟南省親至京還廣

伊昔關河事征戰君家嚴君擁方面君拜元戎領大藩
虎旗耀日光於電北山之北南河南鯨波虎壘相巉巖
轅門上日開將閩白馬朱纓銀作銜軍中呼盧日向午

錦筵置酒夜擊鼓龍潭降卒解西歌翁源女兒學東語
有時俘賊珠海頭海門六月如九秋牙旗揮天虎豹怒
霹靂迸火魚龍愁銀漢淋漓洗穹昊嚴親入覲承恩早
角巾還第誰最高君與君家兄弟好竭來寧親東入齊
歸舟一繫蔣林西鶯花爛熳春如海歌舞流連醉似泥
蟾溪高彬故部曲開宴斗門橋下屋宣州梨子鵝兒黃
吳姬指纖白如玉酒酣耳熱悲故鄉孫蕢在座情更傷
關河北去五千里目斷南天如許長秦淮水生風似雨
十幅蒲帆醉中舉龍灣江口辭故人小孤洲北失前侶
知君第宅遶西湖門對羅浮列畫圖梅花白白想猶昨
盧橘青青今有無三郎今年三十幾平生與蕢最知己

明歲春還若寄書玉堂華館西清裏

往平原別高彬

銀壺綠酒霑春宴環佩朝回奉天殿平生不作兒女悲
獨向高彬淚如霰高彬昔年桑梓雄好賢乃有古人風
東林詩社靜來結北海酒樽長不空竭來弓劍已蕭索
短髮如絲猶好客塞上葡萄火齊紅宣州梨子鵝兒白
沈繇不獨重相知文采今還勝昔時小樓焚香每讀易
淨几把筆常題詩今晨我作平原別高彬不意情欲絕
芙蓉香冷不堪贈楊柳枝黃未宜折龍灣江口石城頭
一幅蒲帆萬里秋暮雲紅樹儻相憶應有音書慰別愁

次歸州

歸州城門半天裏白雲晚向城下起市廛架屋依巖巒
婦女提嬰汲江水巴山雪消江水長城中夜聞灘瀨響
客船樹杪鈎石稜漁父雲端曬罾網家家蕪田山下犁
倒枯大樹燒作坭居人養犬獲山鹿穉子縛柴圈野雞
楚王臺高對赤甲四時猛氣長颺颺柁工鳴板避漩渦
櫓聲搖上黃牛峽

發忠州

顛風翻山雲黑黑星河無光江翕翕搖船夜半發忠州
漩深浪緊船欲立宣公祠下灘嘈嘈船頭著水低復高
石稜割裂箕斗影山鬼出雜魚龍號亦知風水莽回互
王事有程那得顧誰歌太白蜀道難和我靈均遠遊賦

下瞿塘

我從前月來西州錦官城下十日留回船正值九九節
巫山巫峽風颼颼人言灩澦大於馬瞿塘此時不可下
公家王事有程期敢憚微軀作人鮓人鮓甕頭翻白波
怒流觸石爲漩渦柁工敲板助船客破浪一撇如飛梭
灘聲櫓聲歷亂聒緊搖手滑櫓易脫沿洄劃轉如漩風
半側船頭水花沒船頭半沒船尾高水花作雨飛鬚毛
爭牽百丈上崖谷舟子快捷如猿猱攏船把酒聊自勞
因笑輕生博奇好吟詩未解追謫仙天遣經行蜀中道
巴東東下想安流便指歸州向峽州船到岳陽應漸穩
洞庭霜降水如油

題蘇名遠畫竹圖

蘇郎寫竹如寫帖珊瑚爲枝篆籀葉寒梢不及三尺長
遠勢直與青冥接青冥不辨西與東雲光竹色俱空濛
飛廉排山振鸞鷲霹靂迸火驚蛟龍奇搜不獨竹色老
竹傍有石仍更好想其落筆當酒酣人間屏幃愁絕倒
近時吳興趙子昂最能寫竹窮青蒼蘇郎晚出繼芳躅
湖海二妙相輝光十年不到瀟湘浦環佩空懷玉簫女
相期共泛書畫船濃墨淒迷埽煙雨

送翰林典籍張敏行之官西上

燉煌城下沙如雪燉煌城頭無六月關西勁卒築防秋
捷書夜半飛龍樓九重下詔徵貔虎推轂上將開都府

黃旗卷日大軍行旄頭化石夜有聲燉煌迢迢五千里
十月即渡黃河水上將翩翩才且雄平戎不數貳師功
叱咤猶在輪臺北匹馬已入渠黎國左較偏裨晚射鷗
倚鞍醉索單于朝西山黑風吹隋瓦霜角吹秋一作鳴塞垣
下太平今見遠宣威君往從戎幾日歸幕下文儒兼解
武詞林從此有光輝周青士云嘉州遺韻
武昌別魯侍儀舍人文濬

嘖嘖復嘖嘖人生交契真罕得我居翰苑君儀曹幾載
相聞不相識君名早已播南衢出入金門早奏書不謂
同乘建業水還來共食武昌魚武昌魚肥春酒好竟日
流連得傾倒黃鶴樓頭葉亂飛金沙洲上秋將老狂歌

謔浪清致同看君更有古人風才如關西楊伯起一作性
似城東陳孟公相親未幾還分手可憐新知樂未久君
隨征鴈入巴陵我挂雲帆沂川口歸期去去各悽然今
夕星河共一作各一天秋晚還期來促膝與君同賦遠游篇

冬至

冬至至日日初長久客客懷懷故鄉梅蕊惟愁雪爛熳
柳條又是春相將嬾朝違世真自笑憶遠寄書人未央
海門關外暮雲合應有南還征鴈翔

秋風

秋風淅淅吹江亭汴河之柳猶青青黃姑東渡會七夕
白帝西來朝百靈初開琪樹已云落遠別客愁今未醒

欲寫鄉書寄南鴈故園萬里天冥冥

懷四川

草堂煙樹入青霄漢殿荒臺秀黍苗宇宙大一作詩名今尚在風雲霸氣未全銷寒星夜落支機石錦水春明駟馬橋花柳舊游今幾載西風蓬鬢影蕭蕭

龍江夜泊

蔣山山頭秋月明龍江江上暮潮生行人又是金陵客卧聽西風鼓角聲

寄王彥舉

綠楊陰下玉驄嘶絲絡銀餅帶酒攜夢入南園聽夜雨不知身在蔣陵西

出蜀

白帝秋高木葉黃蜀中長是雨浪浪瞿塘水落漩渦小一路看山到岳陽

王佐五首

佐字彥舉家本河東元末侍父宦南雄遂占籍南海洪武初徵至京師授給事中有聽雨軒瀛

洲二集

黃才伯云彥舉才思雄渾體裁甚工趙懷琛云彥舉古風歌行伯仲高岑律詩絕句方駕虞揭

詩話彥舉與孫仲衍結社南園開抗風軒以延嶺表名士及為給事孝陵賜宋學士黃馬帝為作歌命詞臣和彥舉有臣騎黃馬當赤心之句賜鈔一錠然其詩遠不及仲衍而當時之論云構辭敏捷王不如孫句意沈著孫不如王不可謂定評也

唐仙方伎圖

開元天子承平日錦繡山河壯京室金殿璇題表集賢

玉屏粉繪圖無逸
夔龍接武居阿衡
萬方旭日當文明
衡山仙人一作老仙何所有
亦復通籍承恩榮
縞衣黃一作白髮醜

顏老自說時來致
身早綵篋初開玉
仗分白驪突出銀

鞍小榻前製號賜
通玄始信人間別
有天樓船未遣蕊

珠賜歲籥俄更天
寶年九齡歸卧曲
江上牛郎又入中

書相花雨香飄蘭
若鐘柳雲春拂一作撲金雞帳
萬幾日少

樂事多梨園法譜
聲相和鬪雞舞馬
看不足不獨仙人

呈白驪仙人豈是
呈仙伎畫者傳之
有深意延秋門外

羽書飛却駕青驪
向西避青驪劔閣
雨淋鈴長路一作一段間

愁尚不勝不道画
圖今若此碧雲芳
樹滿昭陵

醉夢軒為錢公鉉賦

東吳高士索賦醉
夢詩我亦醉夢無
醒時問君醉夢緣

何事君言不解其
中意但知痛飲復
高眠即此悠悠是

生計乾坤偃仰如
蘧廬心寓鴻荒大
古初人皆掉舌譚

臧否君方默坐糟
丘底人皆明目辨
妍媸君獨黑甜渾

不知君不見汨羅
江邊人獨醒捐軀
徒博千載名人生

適意此為樂何須
苦覓揚州鶴竹葉
杯中閱四時蘆花

被底舒雙脚錢公
錢公真吾師平生
此意君得之我生

落魄惟貪飲百事
無聞只酣寢生死
真同力士鎗榮枯

付與邯鄲枕行行
無何有之鄉麒麟
作脯瓊為漿借得

仙人笙與鶴三清
八極同翱翔

憶舍弟彥常

庭草秋仍綠江楓晚漸稀年光隨水去功業與心違遠
海猶傳箭殊方未授衣翩翩南去鴈故作一行飛

書所見感舊

小小銀箏壓坐偏曾將古調寄新絃芙蓉綠水秋將老
鸚鵡金籠語可憐兩鬢秋霜明鏡裏十年春夢夜燈前
湖山隱約人何在空負當年罨畫船

美人紅葉圖

謝家夫人詠柳絮黃陵女兒歌竹枝誰信長門秋色澹
西風黃葉斷腸詞

黃哲十首

哲字庸之番禺人明初用薦拜翰林待制侍太

子讀書尋兼翰林典籤出知東阿縣升東平府

通判尋坐法死有雪篷集

詩話嶺南無雪惟楊孚宅僅一見之杜子美詩所云南雪不到地也庸
之度嶺而北倚篷聽雪詫曰天下奇音莫是過矣歸構一軒名聽雪篷
鄉里遂稱為雪篷先生其五言詩源本六代
七言亦具體品當在仲衍之下彥舉之上

自君之出矣

自君之出矣無處託鱗音思君如晝燭淚盡不明心

過梁昭明太子墓

帝子降南浦飄飄蒼桂陰神飈迴震闕玄跡闕坤岑鳳
陵輝璞蘊龍沼媚珠沈文藻絢華黻芳芬揚素襟遺編
軼正雅曠代馳徽音玉馬風雲變金鳧歲月深霜蘭秋
被坂煙蘿夕翳林采蘋思永薦捐玦遂幽尋靈脩忽爾

逝歲晏勞予心遼東鶴馭遠緱嶺鸞笙吟眇眇因懷昔
營營徒慨今瑤華竟衰歇惆悵雍門琴

黃才伯云混選
詩中不可甲乙

東平謁堯祠

初政禮羣秩晨趨鄆陰郭稽古詢道源放勳久徂落齋
宮委華祝黼宸銷丹堊庭榛雉升裳蘇宗彞剥惟馨
思可薦廢墜予猶忤緬言垂衣時東狩茲方岳儀像儼
欽明聲容被緜邈茆茨遵曩儉階莫傳舊朔遺澤紛在
斯今皇仰先覺亦播康衢謠紹爾雍熙樂

秋夜雜興呈涂典籤穎

璿杓運西宇華月麗中楹坐知流序易遙夜秋風生銀
漢呈霄景金堂含夕清柔條棲湛露嘉蕙茁幽莖撫迹
遂成感如何君遠征相思雲陽浦岵堯隈玉京寸心渺
何極搖蕩如懸旌

舟次靈洲候廣雄飛使回不至

湛露晨未晞秋華被原隰征塗夙已戒承命履遐邑桂
水寒悠悠揚帆望不及川鱗想同泳羈羽尚云戢維楫
乖素期臨流重於邑睠然桀溺耦詎灑楊朱泣惆悵芳
菲情日暮空佇立

與伯貞或華二友會

二妙聯英標睠言顧榛莽良晤諧宿心玄談慰幽愴江
蘼澹新綠谷鶯聞遠響感此離索情浩蕩煙霞想夷白
抗浮雲臨清延素賞何因繼芳躅一丘同偃仰

日詩卷十
錢區伯寬領歸善邑教

橫塘候秋色芳蕖颺已變渺渺波上舟忽如翔風燕琴
觴激幽思籩豆徒有踐所念周襟者飄飄各鄉縣章縫
協冲素况復斯文彦此邦多奇勝名山蔚蔥嵬暄壑棲
雲霞寒松閱霜霰爾行問津處沮溺因可見

贈劉仁仲昆季還浙東

沈憂自多緒復此送歸人昨夜淮南雨不知芳樹春
竭來持別酒相與慰茲晨日暮行艫渺東南瀕越津

扶溪春望

溪頭望春春色深美人不見勞予心綠波渺渺向南浦
罨畫樓臺芳樹陰天涯滿目丹青障春日春花兩搖漾
翡翠蘭苕不可思鴛鴦桂樹長相望相望相思雲路遙
金塘流水亂春潮採菱風急桂舟晚疑是當年揚子橋
橋邊楊柳青青好惆悵春心被花惱浦口迴船欲訪君
相思一夜蘼蕪老

游洪範池與劉文正

洞門斜日照金潭千尺藤蘿挂石龕騎馬獨來高處望
滿山松柏似江南

李

德

五首

德字仲修番禺人洪武中用薦授雒陽長史遷
濟南府經歷調西安改漢陽教諭陞義寧知縣
有易菴集

詩話長史好效長吉孫仲行戲之曰子誠
混元皇帝孫也然其詩實與長吉相遠

送友回真定

君自邯鄲來復向邯鄲去邯鄲月色好夜照江南樹太
行多峻坂中有羊腸路往來不憚煩知君為親故

棲雲菴

石室凝紫煙空洞懸石乳陰崖含風泉終日灑飛雨臨
流結精舍六月不知暑道人養清虛適與高僧處垢淨
俱已忘孰為舍與取諸幻既遠離白雲日相與何當謝
時人來作塵外侶

種麻

種麻滿東園種花亦盈畝麻生但芄芄花發映戶牖容
華能幾時零落他人手豈如為締綌與君同永久向來
灼灼姿于今復何有

立秋日登漢陽朝宗樓懷鄉中諸友

湖山興不淺而我亦淹留得罪緣微祿懷君屬早秋澹
雲鄉樹遠孤月旅情幽借問衡陽鴈何時到廣州

金陵逢趙汪中

十年長契闊萬里各分飛岐路風煙杳江湖消息稀加
餐俱努力訪舊各霑衣春草無勞綠王孫自不歸

趙介二首

介字伯貞番禺人屢薦辭免坐累逮至京道南
昌卒于舟中後以子純貴贈監察御史有臨清

集

陳廷器云臨清出入漢魏盛唐諸大家間奧而尤究心三百篇之旨以故所作出乎情性止乎禮義讀之有關世教非若世之絢采色調聲響者所能及也

詩話伯貞絕意仕進植雙松於庭榜曰臨清蓋以淵明自擬也屢往還西樵山中有索題詩者去不顧其集雖不傳然名在五先生之列乃刊詩者去伯貞而冠汪忠勤於卷首可為失笑也

聽雨

池草不成夢春眠聽雨聲吳蠶朝食葉漢馬夕歸營花
徑紅應滿溪橋綠漸平南園多酒伴有約候新晴

瑤池

宴罷瑤池暮雨紅碧桃花落幾番風重來八駿無消息
擬逐青鸞入漢宮

林鴻十六首

鴻字子羽福清人洪武初以薦授將樂訓導久

之拜禮部員外與高棟陳亮等同時稱閩中十

子有膳部橐

劉子高云子羽詩已窺陳拾遺之奧大有唐開元之風李賓之云子羽詩專學唐人極力摹擬不

但字面句法并其題亦效之開卷驟視宛如舊本然細味之求其流出肺腑卓然有力者指不能一再屈也徐子元云子羽師法盛唐唐臨

晉帖殆逼真矣惜惟得其貌耳穆敬甫云員外自負良高晚與浦舍人結社愈詣妙境兩人皆詩家俊豪也胡元瑞云林員外諸體皆工

五言律尤勝置唐錢劉間不復辨別七言如珠林霽雪明山殿玉澗飛流帶苑牆氣色高華風骨迥爽顧玄言云林員外才情藻麗如游魚

潛水翔鳶薄天高下各適情性蔣仲舒云子羽命才充裕標格華秀雖以隄柳宮花之句得名他作實多勝者閩人言詩者皆

本鴻黃玄周玄林敏陳仲宏鄭關林伯環張友謙趙迪悉鴻之弟子其詩派禰三唐而禰宋元摹其色象按其音節庶幾似之其所以不及唐

人者正其摹仿形似而不知由悟以入也李舒章云子羽如出林新鶻羽翮初成宋轅文云明初閩中詩人子羽為冠王弇州呵為小乘

要亦是作家

詩話閩中十子子羽稱巨擘焉而循行矩步無鷹揚虎視之姿此猶翡翠蘭苔方塘曲渚非不美觀未足與量江海之大

感秋

撫劔中夜起氣候何淒清天高白露下北斗當前楹
嗷雙飛鴻隨陽亦宵征微禽爾何知寒暑嬰其情始知
玩物化中復念吾生三十志有立一經尚無成緬懷古
哲人信與大運并道在無終始時來暫衰榮感歎不能
寐延首東方明

飲酒

儒生好奇古出口談唐虞儻生義皇前所談乃何如古
人既已死古道存遺書一語不能踐萬卷徒空虛我願
但飲酒不復知有餘君看醉鄉人乃在天地初

金雞巖僧室

遠公青蓮宇百尺構雲闕一徑入松蘿山泉濯苔髮石
房彈玉琴清響在林樾夜來滄海寒夢遶波上月微吟
白雲篇高興了未輟未能悟聲聞安得離言說

沈山子云頗似王龍標

遊芙蓉峰

密竹不知路渡溪微有蹤懸知石上約定向松間逢物
候變黃鳥菖蒲花蒙茸相望不可即裊裊霜天鐘

經東山別墅

別墅在東山經過感疇昔縱橫醉時墨猶在池上石林
氣颯以涼山容澹將夕緬懷攜手人念念不能釋

精巖寺

香刹象天界名僧辭世氛一峰獨凌削衆壑相氤氳作

禮向金仙宴林投鶴羣山犬銜人衣却走避腥葷於時
春向暮林亭藹餘曛蒼然草木氣盡濕西江雲登閣見
千里眇懷滄海濱山鐘忽播蕩應此悟音聞

送吳士顯

吳生跌宕人脫略當世事欲識平生心悠悠江海是布
衣何飄飄孤劔千里至斗酒未及歡看雲起歸思長風
吹古城寒日下秋水分手從此辭車塵望中起

濟中曉起

颺颺城鴉散鼕鼕戍鼓絕空庭寂無人衣上有殘月爽
氣山前來吾襟抱冰雪

秋夜憶周模

傾蓋一分手沈思長在襟况茲離居夕復此秋城砧露
下葉初落草根蟲又吟雖云感物候終念曠幽尋劔水
東南流故人千里心無因達尺素夢遶青楓林

江閣秋雲圖

山容初斂夕雲氣已歸壑何以散冲襟孤琴坐江閣美
人期不來天寒楓葉落

賦得獨樹邊淮送人之京

君不見秦淮水流東到海淮邊獨樹如車蓋九月微霜
赤葉乾枯枝颯颯鳴天籟枝上啼鴉散曙煙枝頭殘照
咽寒蟬離人留飲停車騎俠客相逢挂馬鞭南國高僧
從此去駐錫雨花臺下路一飯淮邊洗盃時六時晏坐

日言卷十
祇園樹野鶴孤雲任往還禪心不道別離難山中亦有
長松樹待爾青青共歲寒

經綺岫故宮

行人曉飯青山裏驅馬蒼茫經洛水昔聞綺岫盛繁華
不謂荒涼今若此憶昔行宮初構時梯巖架壑相逶迤
美人桂殿夜看月公子柘弓朝射麋翠華一去金門鎖
露電飛螢山葉隨往事吹殘牧笛風危基半入樵人火
今古消沈能幾回春風依舊野花開君王巡狩不復見
禾黍空山鳥雀哀

巫峽啼猿歌送丘少府歸四明

巫山巫峽連三巴猿啼三聲客思家停舟聽之聲未了
却過青枝猶裊裊野人乍來錦官城清秋滄峽啼猿聲
黃牛灘下怨楓落白帝祠前哀月明商聲清冽羽聲亂
倏忽東崖復西澗久客聞之淚欲乾壯夫聽此魂亦斷
故人歸卧越山雲憶得啼猿歌送君扁舟獨宿剡溪夜
叫月三聲誰共聞

送高郎中使北

漢使臨邊日天驕已請和看花辭紫陌犯雪渡交河水
草留行帳雲沙想玉珂誰知清漠北婁敬策居多

鍾廣漢云絕似

元郎士

留別蔡秀才原

別離無遠近暫去亦傷神正是千山雪誰悲獨往人江

空螺女夜花暗冷城春不見同游侶酣歌淚滿巾
憶龍門高逸人

浮亭露飲玉樽空千里心期此夕同海路想經春草綠
越吟愁對夜燈紅他山花發鶯啼後別墅春歸積雨中
聖代祇今無隱逸不應多病卧孤蓬

陳亮 二首

亮字景明福州長樂人明初累詔不出有儲玉

齋集

李時遠云亮詩
冲澹有陶韋風

夜泊古崎

寒山夜蒼蒼清猿數聲響風生蘆葦鳴水落洲渚廣月
落知潮來時聞人蕩槳

秋暮懷劉宗魯

海國別來久長懷瓊樹枝閒齋坐幽獨悵望秋風時自
非物外人邈焉難與期空傷綠華歇坐惜白日馳對酒
更愁予勞歌空爾思

唐泰 一首

泰字亨仲福州閩縣人洪武甲戌進士授行人
終陝西副使有善鳴集

江上書懷寄周大林大

昔年曾共醉蘭舟明月閒情憶舊遊獨客荒邨空向暮
異鄉多病畏逢秋殘煙野戍聞寒笛落日楓林見驛樓
為報別來憔悴甚漫因尊酒一消憂

鄭定一首

定字孟宣福州閩縣人陳友定辟為記室友定
敗浮海亡文廣間久之還居長樂洪武中徵授
延平訓導歷齊府紀善終國子助教有澹齋集
伏波祠懷古

荒祠衰草已淒然猶有居人話昔年銅鼓苔生秋雨後
石牆花落夕陽邊竹書早著平蠻策沙井空餘飲馬泉
詞客經過休感慨雲臺麟閣總寒煙

王 褒 一首

褒字中美閩縣人洪武癸酉舉人官至王府紀
善有養靜集

題秋林泉石圖

高林頗深邃遠洲亦縈紆風景亦何異中有隱者廬陽
崖落日明陰澗浮雲虛耕野見秋火扣舷聞夜漁竭來
塵網中機務日相拘念茲膏肓疾媿彼泉石圖抱拙謝
簪黻養素宜琴書俯仰天宇寬所樂恒有餘

高 棟 八首

棟字彥恢仕籍名廷禮長樂人永樂初以布衣
召入翰林為待詔久之陞典籍卒於官有木天
清氣嘯臺二集

林尚默云詩始漢魏至唐極盛宋失之理趣元

滯於學識而不知由悟以入自襄城楊士弘始

編唐音然知者尚鮮先生選唐詩品彙議者服其精博平生賦詠流傳

海內又能書工画時稱三絕 俞汝成云漫士意興俱佳而歌行尤勝
顧玄言云翰籍才識博達惜文多意少且乏新興至擬古諸作頗擅
雕蟲往往有青於藍者 李時遠云廷禮深得唐人風致

漫士嘯臺集其山居擬唐之作音節可觀神理未足時出俊語錚錚自賞木天集應酬冗長塵空堆積不足與宋元人作僕何況三唐李舒章云廷禮如製錦善手頗有尺度

詩話廷禮擬唐如薛稷鍾紹京之雙鉤終下真蹟一等五古若長空一飛鴈落日千里至夜色不映水微風忽吹裳銜杯雙樹間百里見海色飛雨一峰來微雲度疎竹不失唐人遺韻

九月八日郭南山亭宴集分得下字

海國霜氣涼秋聲落遙野乾坤肅以清收納屬多暇出郭尋幽期同人命軒駕載酒入翠微憑高憩層榭蒼山橫黃雲大江天同瀉飛雨霞際晴夕陽鴈邊下江山滿陳迹今古成代謝高興殊未平臨風獨悲咤

同羣公餞鄭五秀才至鼓山寺分題贈別賦得臨滄亭

劣削海上秀中峰開禪宮飛亭挂空翠直上臨方蓬溟漲在几席天光映簾櫳目極萬里外但見青濛濛曙色從東來晃然霧境空登臨豈不偉別意歎無窮

賦得羅浮霜月懷二逸人

海國梅始白飛霜動鳴鐘寒空一片月挂在羅浮峰夜色不映水清光與之同百里皆瑤華千林闕幽風蕭條巖際葉嘹啖雲邊鴻遠客起遙念滄波思千重夢迴明鏡沒寂歷聞幽蛩

題邑生陳溢鍾山草堂

鍾山抱藍田水木含清氣愛爾靜者居草堂在山翠簾櫳映竹開几席侵花置野客載酒過山僧抱琴至陶然

接歡賞邈爾成幽契月出天海空雲生石門閉岱溪樵
唱來沙頭松聲細佳趣足淹留遠心更迢遞維時屬休
明巖穴無遺棄終南登捷徑北山裂荷製予亦問山靈
斯人果忘世

賦得燈前細雨贈別鄭浮丘

野館昏色來明燈靜深塢故人惜睽違共此尊前雨寒
影明遠心夜深帶離苦飄蕭初拂席颯沓仍近戶重靄
溼餘芳宿雲暗平楚明發送君行淒淒滿南浦

水竹居

清溪入雲木隱處林塘深微月到流水泠泠竹間琴虛
聲起遙聽天影激遠心余亦鸞鶴侶將期此投簪

酬林一和閒齋見懷之作

東山遙夜鴈歸聲兩地相思舊感生芳草白雲無那別
春風黃鳥若為情雙溪日下鷗波靜獨樹原頭獵火明
誰道離居成寂寞好文地主久知名

擬蘇許公頌侍宴安樂公主新宅應制

飛構雲邊帝子家宸遊天上駐仙車玉杯春醉平陽館
銀漢秋行博望查萬樹芳花迎日吐千條弱柳向風斜
皇情愛物懽無極能使羣心戀翠華

蔣仲舒云運斤成風信堪
膾炙胡元瑞云諸詩殊

有唐風國初襲
元此調罕觀

王 偁 七首

偁字孟揚其先東阿人從父翰宦流寓閩中洪

武庚午舉人永樂初用薦授國史院簡討命參

英國公張輔軍事坐黨下獄死有虛舟集解大紳云孟揚

詩欲凌駕盛唐徐子元云孟揚凌駕漢唐見推解子東南天柱焉用

洪達顧玄言云孟揚典雅清拔綽有天寶俊聲蔣仲舒云虛舟詩

句從新鑄材自故來穆敬甫云王詩從容典麗得

風人體裁者曹能始云孟揚詩本李白矯矯不羈

詩話孟揚才名與解大紳相伍其獲罪亦同然詩格

華整遠勝學士聞當日有明詩選本惜無從見之

車遥遥

車輪何遥遥西上長安道不見車上人空悲道傍草君
行日已遠恩愛難自保憂來當何如一夕夢顛倒豈無
中山酒一浣我懷抱但恐三春華顏色不再好車聲何
鄰鄰風吹馬蹄塵願隨馬蹄塵飛逐君車輪

短歌行

東風吹花隋錦筵綠楊搖蕩青樓煙主人自為鸚鵡舞
小伎更奏鴛鴦絃當杯入手君未醉落日已在西山巔
短歌一曲心茫然請看明鏡高堂上何須白髮悲芳年
入西山訪張隱士

邕州

兩崖噴飛瀑結屋煙蘿裏山人不冠屨客至同隱几獨
鶴海上歸孤雲澗中起淨埽白石牀風來墮松子

五管推名郡雙江接上游人家蠻霧曉山雨瘴煙秋遠
客誰青眼殊方易白頭今宵南極外分野望牽牛

楊秀才幽居

楊子幽居處閒窗面遠空水喧明鏡裏雲落畫屏中卷

慢留山月揮絃送晚鴻何人問奇字載酒野橋東

宿巴陵聞笛

玉笛飄殘月下聲空江秋入思冥冥怪來楊柳移關塞
可是梅花落洞庭半夜旅魂隨調切誰家少婦倚樓聽
曉來更覓龍吟處一點君山水面清

左江錄似友人

左江江水日潺潺鳥語莎裳住百蠻莫道天涯應在此
交州更隔萬重山

王恭十九首

恭字安中自稱皆山樵者閩縣人永樂初以儒
士薦起待詔翰林與脩大典授翰林典籍投牒

歸有白雲樵唱鳳臺清嘯草澤狂歌

顧玄言云安中思多懷怨託喻

頗深 穆敬甫云王詩工而有調乃潛心風雅者 林衡者云皆山善
得中唐之韻如渭水寒流秦塞晚灞陵殘雨漢原秋他鄉見月長為客
別路逢霜半在船鳥外明河秋一葉天涯涼月夜千峰雲歸獨樹天邊
小雪罷孤峰鳥外青驛館夜殘明候火市樓霜曉度寒砧樓閣葉上驚
新雨砧杵聲中憶故園幾處移家鷺落葉十年歸夢在孤舟家臨故苑
長洲樹鐘度寒山半夜船帆飛楚水舟中飯夢繞淮山樹裏行均有大
曆十子

詩話素景文以白燕詩得名然如月明湘水初無影雪滿梁園尚未歸
翻不若琴川時大本之珠簾十二中間卷玉剪一雙高下飛也顧光遠
以白鴈詩得名然如錦瑟夜調冰作柱玉關曉度雪侵衣亦不若王安
中之夜雨蘆花看不定夕陽楓樹見初飛也安中整練不及子羽而風
華跌宕多縹緲
之音固似勝之

去婦詞

刺促何刺促東家迎昏西家哭哭聲休使東家聞東家
車馬方如雲滿堂笑語看珠翠夾道風傳蘭麝熏浮雲

上天花落樹君心一失無回悟明知遣妾何所歸飲淚
行尋出門路青銅鏡面無光采妾心尚在容華改東家
新婦傾城姿似妾從前初嫁時

舟次鐔津

木落川氣涼鴻飛水容夕微燈射遠沙夜榜鄰幽石月
色棲處寒霜花坐來白遙見九華峰蒼蒼但蘿薜

初秋同叔岌彥時遊崇山蘭若

習靜厭紛擾幽尋給孤園翛然香林下似得桃花源一
鳥落天鏡千花秀禪門紛吾道機淺謬接甘露言月色
隱秋思荷香清夜魂終希偶緇錫永矣超塵喧

雞公壟

荒岡古墓雞壟邊蔓草離離生野煙狐狸養子隱荆棘
烏鳶作巢銜紙錢石麟薶沈土花溼月下精靈語還泣
此墳未必無子孫浮榮一去不復存誰家新冢高數尺
又買西家墳上石

感懷

不彈貢禹冠不結蕭朱綬幾處移家任轉蓬半生失路
惟耽酒兔園挾策竟徒然欲逐長沮學種田秋風僅有
相如壁舊物空餘子敬醴異鄉淪落無朋友論文昨日
今何有誤將偃蹇對時人豈謂新知不忠厚萬事蕭然
一布衣白頭夢想故山薇抱琴欲奏猗蘭曲目送雲天
斷鴈飛

聞笛歌送人之塞上

橫笛對離亭扁舟越江口月下何人最斷腸天涯怨別
驚楊柳此夜愁心獨對君明朝悵別又離羣單于城上
吹羌管知爾相思不忍聞

題扇

山蒼蒼兮白雲谷窅窅兮夕氛鴻高飛兮遠逝蟬薄暮
兮空聞泛木蘭兮容與隱薜荔兮氤氳紛吾老兮旣拙
誓相從兮夫君

書江山別意圖送羽人還神樂觀

羽人何處去歸事玉宸君飛珮花間別橫簫鶴上聞過
關闕樹斷挂席楚江分想到齋宮夕圓丘候五雲

江樓聞笛

纖月挂風林晴樓覆夕陰誰家吹鳳管永夜作龍吟楊
柳邊頭恨梅花笛裏心天明漢江上惟見水雲深

寄滄洲狂客

三年憔悴得君憐君上青雲益惘然客裏思鄉何日到
大涯見月幾回圓未期歲晚同攜手預恐新正對別筵
貧賤獨慙無可贈臨岐空憶繞朝鞭

鷓鴣

綠樹殘春暗雙飛錦翼齊長沙有遷客莫向雨中啼

題水墨小景

白鷗門外孤艇黃葉山中一瓢惆悵青雲舊侶相思不

到漁樵

詠秋風

青蘋江上響蕭蕭
吹得林間萬葉飄
何處淒涼最關別
數株殘柳灞陵橋

邨居

草徑茆扉帶軟沙
隔林雞犬幾人家
青山盡日垂簾坐
落盡梭櫚一樹花

春鴈

春風一夜到衡陽
楚水燕山萬里長
莫怪春來便歸去
江南雖好是他鄉

老馬

百戰沙場老此身
長楸宮草幾回春
只今棄擲寒郊路
猶自悲鳴戀主人

山樓對酒

樓前積水映蒼苔
卷幔孤雲落酒杯
更盡一樽秋雨外
故山曾有幾人回

月下聞箏

愁心不見薛瓊瓊
何處銀箏半夜聲
腸斷十三絃上月
一絃一柱總關情

二馬圖

紫騮嘶逐玉花驄
曾是沙場百戰功
今日奚官重翦拂
落花芳草灞陵東

黃 玄 一首

玄字玄之侯官人官泉州訓導

詩話林子羽倡風雅於八閩從之游者頗衆而獨矜許二玄為入室弟子其贈玄之詩云予也夙穎悟十五始知文冥心三十年尋源頗知津探奇始有得服膺如獲珍逝將覺後生庶以酬先民青衿二十徒達者惟黃玄持此欲有授二玄乃其人然二子詩太荏弱句續字湊不能成家似非孟揚漫士皆山之伍南皮李氏稱二子詩託興悠遠殊不爾也

河上立春

故國幾時別殊鄉今早春青陽開霽雪殘日送歸人漸
與雲霄隔空驚歲月新不堪零落處愁淚滿衣巾

周 玄 一首

玄字微之閩縣人以文學徵為禮部郎中有宜
秋集

題青城圖

青城辭家仙路遙秋後白雲還見招商山老人不歸去
巖徑松扉長寂寥

明詩綜卷十

明詩綜卷十一

小長蘆 朱彝尊 錄

濡須 朱端 緝評

陶宗儀 四首

宗儀字九成黃巖人少舉進士不中即棄去僦居松江至正間累辭辟舉張氏開閫辟軍諮亦不就洪武六年舉人才至京以病固辭得放歸

有滄浪權歌南村集

唐士綱云公以黍離麥秀之餘而有駿發蹈厲之氣撫窮淪落之景而無危

苦憤激之辭足以見其所存矣

九成詩自敘洪武二十九

年丙子率諸生赴禮部考試讀大誥賜鈔遣歸豈其晚年亦曾列官教授邪 高二鮑云九成画天台山圖自題云子挈家避地雲間杜樹之北背負九峰皆平衍無奇每憶故山為作此圖所謂杜樹之北在松江府治東北十餘里即今泗涇南村草堂之址在焉又 名小栗里倪元鎮王叔明俱為之寫圖子皆見之

靜志居詩話南村練習掌故元朝野舊事藉輟耕錄以存其餘若草莽私乘游志續編書史會要皆有裨史學入明自稱其居爲小栗里雖好爵未縻然其集中詩如乙卯人日云天子居大室念民日孜孜上帝昭聖心報錫以雍熙紀行詩云弭擢中和橋僦舍千步廊報名謁鴻臚會朝筮鵠行國安四方靜君明六卿良聖德湛汪濊慶祚衍靈長入都門詩云虎踞龍蟠眞聖主天開地設古神州早朝詩云黼坐正中天咫尺叩頭丹陛益凌兢聞皇太孫即位詩云先帝逍遙游碧落神孫端拱坐明堂九重統握乾坤大萬國恩霑雨露香動植飛潛滋德色都俞吁咈慶明良老臣舞忭南村底笑對兒孫兩鬢蒼竊謂此等詩可以不作可以不作而作之宜錄入明詩矣

折楊柳送夏西疇謫居大梁

折楊柳贈君別楊柳未折心已折丈夫落落志四方到此誰能不嗚咽江南九月天雨霜鴈聲隨地秋風長出門行行幾千里寒煙落日增離傷令嚴獨許攜家室藤笈編花載書帙可憐身上千金裘阿彌手縫鍼線密吾聞中原百戰餘民物鮮少城邑虛君去結廬得幽勝便可小擬西疇居荆榛塞路猛虎伏鬪髀如山冤鬼哭願言緩轡毋疾驅疾驅恐妨傷馬足折楊柳歌苦詞呼酒酌君君莫辭黃河之水東南馳人生會合還有時

五里塘

破屋三家市扁舟五里塘冷波浮落照飢雀聚枯桑氛祲乾坤戚兵戈道路長漂流無倚著何日定歸鄉

題王筠菴水村

垂楊舊種成籬落小徑初開近石缸夜雨漁舟添个个晴沙鷗鳥下雙雙夢魂不到鳴珂里卜築何須濯錦江沽酒鱸魚從野老高歌招隱壓新腔

次韻荅楊廉夫

明言錄卷十一
二
移家正在小斜川新買黃牛學種田
奏賦不騎沙苑馬
懷歸長夢浙江船
窗浮爽氣清山近
書染涼陰綠樹員
樂歲未教餅有粟
全資芋栗應賓筵

舒頌二首

頌字道原績溪人元末台州學正明初禮聘以疾辭不出學者稱為貞素先生有華陽貞素齋

集

唐仲實云公之為詩盤桓蒼古不貴纖巧織紵之習道原辭名之後名其齋曰貞素嘗有詩曰湖海半生客乾坤一布

衣義哉周伯叔飽食首陽薇其寄託如此

詩話道原以貞素名齋雖絕意仕進然觀其集如祀事詩三賢堂登源廟碑既孫其言未免降其志矣其自傳云先生喜歌詠或古風長律取意而足不蹈襲不求奇務在理勝又自敘云當飢寒鬱悒不堪於懷發而為哀怨憤切之語關乎風教擊乎世事槩見乎辭可謂得失寸心知矣為苗民所苦一歌直寫胸臆絕少支辭第用韻太雜故置不錄

繅絲歎

東家繅絲如蠟黃西家繅絲白如霜
黃白絲出蠶口長短繅出婦手
大姑停車愁解官小姑剥繭愁冬寒
向來苦留二月賣去年索逋今未完
手足皸瘃事亦小官府鞭笞何日了
吏胥夜打門穉耆生煩惱君不見江南人家種麻勝種田臘月忍凍衣無緜却過廬州換木棉

雨

黑雲壓天殷其雷白雨如注西南來
於時我方高枕卧池上菡萏花初開
從渠雷昏與霧暗推起篷窗時一看
頃刻陰霾盡掃除幸免衝隄及破岸
天風不來如鏡平一輪明月海底生

謝應芳 九首

應芳字子蘭武進人自號龜巢老人有龜巢集

張志道云子蘭詩雅正純潔可與傅與礪相伯仲

詩話龜巢集未鏤板予得其手鈔本一十八冊大半酬應之作所居龜巢一在湖上一在橫山先後有記其略云千歲之龜巢於蓮葉以葉為巢初不費經營之力也暇與田夫野老涉桑苧之園過桃李之蹊瓦盆濁醪歌舞酬酢若曳尾泥塗者然雖巢外之樂其樂亦因巢而得也又云予所至以龜巢名室蓋不以棟宇為巢而以天地為巢也峻宇雕牆莫知其光華門圭竇莫知其陋誦其文可謂達觀之士矣其上饒參政啓云辭親日下奉檄浙東紛紛服州縣之勞區區益升斗之祿望蓬萊於滄海棲枳棘於慈溪謝張雲門啓云鮎上竹竿往歲之功名可笑龜巢蓮葉近年之身世如浮則嘗仕於元者也

歸故里

憶昔走避兵棄別鄉井去意將朝暮歸行行罷回顧安知踰一紀方踏去時路四郊皆蔓草白日暝如霧披榛訪問里隔水拜丘墓傷哉鶴鴿原黃蒿走狐兔別墅破垣在郵亭乃新作鄰兒二三輩衡茅畫扁戶初若不相識熟視肖厥父坐久泣且言為我話親故什九死兵戈餘亡不知處其詞吐未終我淚已如注對食不能餐相期歸蠹聚吾將語吾兒賣書買農具歸耕壩上田此心庶無負

逸菴詩為吳子明賦

日高三丈餘先生睡初起澱山小湖邊草亭脩竹裏消搖漉酒中傲兀燒香几放鶴上晴霄觀魚戲春水世事了不聞無勞洗吾耳

河鮑

世言河鮪魚大美有大毒彼美我不知彼毒聞已熟其
子小若芥俄可大如菽雖有膳夫經務使血出漉烹燒
一失飪禍至不轉矚西家昨留賓登盤偶欲速先聞笑
啞啞後乃號咷哭良由流涎饑豈是鬼伯促或言直一
死輕命重口腹溺愛多不明奚止此水族吾作河鮪詩
逢人敢忠告

踏車婦

吳田水深三尺許猶是去年秋暮雨勸農使者催春耕
田甲頻搗水車鼓江村破屋能幾家家婦姑俱踏車
蓬飛兩鬢赤霜脚亦有兒女雙髻丫淞江太湖愁滿眼
白汗霑衣足生繭車輪鹿鹿羊角轉水波翻翻龍舌卷
春來十日九日晴不聞鶉鳩呼雨聲牛毛微颺土未濕
辛苦又加三日程當家豈無夫與子打魚糴米去城市
城中禁米難出關田上忍飢還戽水四郊未種圍田穀
三邊催運官倉粟

吳下詠懷

近聞哀痛詔使者又江東兵革何時已車書四海同落
梅春雨後芳草夕陽中欲作菟裘計桃源路不通

贈慶別駕

台州別駕不之官烟水孤村共歲寒偶有濁醪留晚酌
旋挑生菜簇春盤三年鄰里通家好四海兵戈行路難
且喜門前金色柳東風堪作画圖看

伏日寄懷江浙高掾史

伏日常年苦炎熱今年伏日風雨涼官曹早出丞相府
賓客高會清暑堂垂楊繫馬綠陰淨画舸采蓮紅粉香
西子湖頭歌一曲前身合是水仙王

雨中懷秦主簿

東門之東西市西人家屋頭啼竹雞新年十日九風雨
老子幾時能杖藜

寄徑山悅堂長老

每憶城南隱者家崑山石火徑山茶年年春晚重門閉
卧聽階前落地花

沈貞十首

貞字元吉長興人元末隱居橫玉山之士林自
號茶山老人明初不仕有茶山集

詩話茶山老人敦壘上履二之節從白雲游始終不出方之楊廉夫輩
呼來即來遣去便去者如論奕然更高一品矣集五十卷惜不傳從陳
編中搜得樂神曲一十三首不無冗長且多
闕文因汰其六稍為刪易補綴頗覺奇古

樂神曲 七首有序

樂神曲者擬楚辭九歌而作也吳人尚鬼祀必
以巫覡迎送舞歌登獻其辭褻嫚穰災徼福不
知其分滋黷甚矣故為此辭以明鬼神之神理禱
祀之意祛其荒淫之志焉

保我之民予邑此方崇其墉宁浚其隍民不驚予志定
眷靈修予作民命隄楊予結陰青青予蔽林女牆堅予

有郭有郭繞回灣兮濠歸于壑靈之來兮玄都颺旂旌
兮若茶陳一豕兮兩輪載斟之兮百壺城兮隍兮吾永
無虞

右城隍

嗟靈伯兮御清泠洗袪歆兮滌炎蒸駘蕩兮春初颺颺
兮夏徂颺颺下兮木葉枯號空桑兮吹雪載塗靈之來
兮憑女巫巫女巫兮屢舞箬簫兮伐鼓靈醉飽兮無怒蕭
蕭來兮颺颺去

右風伯

佩芳蘭兮擘芬椒潔新服兮綴珠珎駕靈螭兮翔重霄
要靈輅兮下迢迢我禾兮成役我田兮龜坼烈日兮驕
陽利行水兮熱湯靈之徠兮天外下土乾兮霑一溉維
靈布澤兮惠我無私嗟我民兮其敢斲思靈皇皇兮萃
只舞僛僛以醉止福襍襍兮歲復歲只

右雨師

月維仲兮日維剛肅齋宮兮神所藏靈輝輝兮垂佩儼
飛馭兮高蓋降靈雨兮來斯左有翁兮右有妃悵嘉期
兮難又羌永歎兮陳辭靈修修兮不語逝翩翩兮歸去

右社公

波震蕩兮具區既底定兮奠神之居芙蓉兮菱車導翠
龜兮文魚神之來兮孰俱後子皮子前靈胥與神游兮
湖之許衝風息兮極浦有倡兮妙舞有列兮清酤神飽

聿歸兮或返而顧灌吾田兮受神之祐

右太湖神

雄何爲兮厲於鄉祀有時兮享有嘗楮白馬兮青蓋明
而無兮晦而在屏方相兮去儼神巫進兮舞且歌雄欣
欣兮遠逝不水旱兮不疵厲樂吾民兮世世

右鄉厲

兩旗兮分張舞輕風兮悠揚神之司兮我疆原田每每
兮立我青秧不稂不莠兮無疔無妨時雨兮時暘俾百
穀兮登場維神兮降康報之兮肴蒸脂羊

右青苗神

桃花塢山行

青絲玉壺當馬提山花笑壓銀鞍低冷霧袞袞襲瑶草
暖風拂拂吹棠梨詩筆落紙興不淺醉眼傲人春自迷
幽禽應笑容狂甚飛入落紅深處啼

湖上

遠水晴山湖上村柳花飛雪擁柴門魚吹浪沫翻萍葉
鳥浴隄沙糝草根獨老一區揚子宅誰爭三里謝公墩
清吟冷館無寥賴皓首空招楚客魂

陳墓嶺

陳墓憑高興倍增酒闌扶力強來登山禽下啄薔薇子
野鼠高懸薜荔藤夜雨長廊蕭帝寺夕陽衰草漢家陵
西風并入干戈眼猶憶高臺舊瞭鷹

華幼武 二首

幼武字彥清無錫人有黃楊集

俞有立云樓碧翁處患難流離未嘗廢吟詠老

而愈工要其胸中不以窮通得喪易其志槩可見矣其詩一以工部為法句不苟造章不漫成務去其猗鄙而求其雅麗長篇春容短吟潔淨有人所不及者

詩話彥清以貨雄於鄉陳子貞謂其愛詩甚篤而奪於多事題其集曰黃楊且云黃楊遇閏則厄彥清能不為閏所厄則干霄聳壑予將承其餘陰之下矣其後宅燬於火始移吳郡繼遷海虞又居吳江瓊尾播遷吟詠不廢當明之初富家類多徙濠彥清獨以上中山王詩得免於禍幸矣詩頗淺易曲林睡起二絕特工選家多不錄特表出之

寄曲林

湖上春風也太顛燈前愁殺泛湖船故人何處聽春雨
應在江樓未得眠

睡起

梅子將黃杏子肥綠陰門巷客來稀南窗一枕睡初覺
胡蝶滿園如雪飛

貢悅 五首

悅初名性之字友初世家宣城之南湖人號南湖先生仕元為閩省理官明初隱居越之山陰

卒門人私謚曰貞晦有南湖集

李賓之云南湖詩清新可傳

詩話貞晦詩滑而不澀縱而不控固是雲林玩齋家法若越王臺作風作鳴潮吹雨散山如走馬渡江來則警策也

接曹孟圭

曲江新漲黃梅雨雨裏客船江上來對酒肯辭今夕醉
有懷能向幾人開歌傳皓齒香生席舞按纖腰月滿臺
縱是金吾嚴禁夜也須容我更遲迴

畫馬

天閑牽出許奚官飲罷春流未解鞍記得曾陪仙仗立
五雲深處隔花看

畫蓮

吳王宮殿水流香步履廊深暑氣涼長日香風吹不斷
藕花多處浴鴛鴦

題畫

桃花紅綻斷橋邊楊柳垂陰散綠煙記得少年曾取醉
玉人扶上總宜船

題菜

西風吹動錦爛斑曉起窺園露未乾三日宿醒醒不得

正思風味到辛盤

張昱九首

昱字光弼廬陵人遷杭元末行樞密院判官有

張光弼集

楊東里云先生詩氣宇闔壯節制老成而從容雅則稱其所傳

詩話光弼策張士誠之必敗作詩刺之云一陣東風一陣寒芭蕉長過石闌干只消幾箇蓴騰醉看得春光到牡丹士誠招之不赴投以詩云山中棊局迷樵客溪上桃花誤釣船又云殘夢已隨舟楫遠五湖春水一鷗飛其居在西湖壽安坊今之花市也貧無以葺廬凌彥紳草募疏云昌黎寄玉川子首稱洛城破屋數間東坡題綠筠軒終比揚州纏腰十萬必能修我牆屋方可有此室廬一笑居士在江西生為斗南望詩名優於張籍生計劣於陶潛囊無一錢之留家徒四壁之立若非慷慨多助安得輪奐一新必欲取杜工部草堂贊何時可辦儻葺得楊太尉槐市塾今歲無憂諸賢圖之名教事也後孝陵徵至京深見溫接憫其老曰可閒矣遣還因自號可閒老人嘗於酒邊為瞿宗吉誦已作歌風臺詩云世間快意寧有此亭長還鄉作天子以界尺擊案淵淵作金石聲其詩派出西崑未免過於濃緝如萬斛春光金盞酒百年心事玉人箏燒殘蠟燭渾成淚折斷蓮莖却是絲暮雨欲來銀燭上春寒猶在酒尊空星河織女從離別海水蓬萊見淺清蛺蝶畫羅官樣燭珊瑚小柱

教坊箏自從玉樹成歌後曾見銅仙下淚來牡丹開後春無力燕子歸來事可憐分司御史心先醉多病相如渴又生月色夜留江叟笛花枝春覆市樓箏揚州城郭高低樹瓜步帆檣上下風令揚大年見之定把臂恨晚也

少年行

看取木槿花朝榮夕已萎芳容有彫謝賦澤何所施壽命如可長仙人今何之高堂有歌舞及此少年時

上巳日偕徐大章游智果寺

佳辰際上巳屬此清明前春景已云晏風光猶未暄往尋智果寺竟得參寥泉雲物豈殊昔人世自更遷邈哉長公詠高吟憶當年吾輩復登臨花界何因緣古佛儼香閣真詮積華軒境超萬念空道勝諸妄捐緬彼此會難徘徊未言旋申章續芳藻冀或來者傳

白翎雀歌

烏桓城下白翎雀雄鳴雌隨求飲啄有時決起天上飛告訴生來毛羽弱西河伶人火倪赤能以絲聲代禽臆象牙指撥十三絃宛轉絳音哀且急女真處子舞進觴團衫擊帶分兩旁玉纖羅袖柘枝體要與雀聲相頡頏朝彈暮彈白翎雀貴人聽之以為樂變化春光指顧間萬蕊千花動絃索只今蕭條河水邊宮庭毀盡沙依然傷哉不聞白翎雀但見落日生寒煙

詩話陳雲嶠云白翎雀生於烏桓朔漠之地雌雄和鳴自得其樂世皇因命伶人碩德間製曲以名之曲成上曰何其未有哀怨衰廢之音乎時譜已傳矣故至今莫之改陶九成云白翎雀者教坊大曲也始甚雍容和緩終則急躁絳促殊無有餘不盡之意楊廉夫云白翎雀能制猛獸尤善擒駕鵝廉夫有二詩詠之張思廉王子充張光弼皆有作第雲嶠言製曲者碩德間而光弼獨云西河伶人火倪赤能以絲聲代禽臆

微有
不同

惆悵

三山夢斷綵雲空幾把長箋賦惱公畫閣小杯鸚鵡綠
玉盤纖手荔支紅春衫汗裊薔薇露夜帳香回茉莉風
惆悵近來江海上却將鞍馬學從戎

繡毬花次兀顏廉使韻

繡毬春晚欲生寒滿樹玲瓏雪未乾落遍楊花渾不覺
飛來胡蝶忽成團釵頭嬾戴應嫌重手裏閑拋却好看
天女夜涼乘月到羽車偷駐碧闌干

感事

雨過湖樓作晚寒此心時暫酒邊寬杞人唯恐青天墜
精衛難期碧海乾鴻鴈信從天上過山河影在月中看
洛陽橋上聞鶻處誰識當時獨倚闌

如此江山清集同王仲玉陸進之呂世臣作

吳越江山會此亭暮春風景晝冥冥長空孤鳥望中沒
落日數峰煙外青不用登臨生感慨且憑談笑慰飄零
古今何限英雄恨付與江湖醉客聽

題揚州左史臣画扇

后土祠前路金鞍憶舊游春風雙燕子渾似在揚州

臨平湖

船過臨平欲住難藕花紅白水雲間只應一霎溟濛雨
不得分明看好山

周砥二首

砥字履道吳人寓居無錫與宜興馬治游荆谿

山水有荆南倡和集

顧仲瑛云履道與倪雲林最相友善故其詩画亦似之

登西岡望龍池諸峰贈馬二山人

登臨不陟險緩步情始暢振衣西岡頭矯首一長望朝陽匿光彩宿霧隱巖嶂迴風過林莽草木皆震蕩山人地志熟指顧名所向窮歷吾豈能高情倚疎放平生煙霞志配此丘壑尚思欲逃喧卑結茅計非曠緣知兵革後已恐溥朴喪蕭條采芝意臨流重惆悵

春日

空山寂寂行人稀岡頭落花如雨飛罷琴惆悵不能已

故鄉寥落何當歸南去百粵羽書急北來三吳戎馬肥安得龍驤擁戰艦埽除俘寇揚軍威

吳志淳一首

志淳字主一以字行無為州人仕元為翰林待制濠泗兵起徙家豫章復徙鄞有環碧軒柳南

漁隱二集

詩話待制草隸著名詩亦雅正虞道園贈詩云揮毫妙得中郎法倚席長吟老杜詩為名流傾倒若此晚賦遣懷詩云為儒已入他州籍垂老頻收故國書誦之淒然增淪落之感

小姑山

長江數千里屹立一峰尊開闢由神禹朝宗自海門魚龍藏白晝星斗動黃昏祇有孤舟客歸心逐浪翻

顧觀一首

觀字利賓丹陽人仕元為星子縣尉遇亂流寓

紹興

劉彥昂云利賓詩可方秋露芙蓉 王元美云觀送人詩重經白下橋頭路頗憶玄都觀裏花 吳江詩鴻鴈一聲天接水蒹葭

八月露為霜此等語參之貞元長慶亦無媿色

詩話吳主一顧利賓入明未聞通籍

然其詩編入劉仔肩明雅頌正音

過吳淞江

吳淞三萬六千頃震澤與之俱渺茫鴻鴈一聲天接水

蒹葭八月露為霜輕風謾颭漁榔笛落日偏驚估客航

我亦年來倦游歷解纓隨處濯滄浪

高明一首

明字則誠瑞安人元至正進士為處州錄事太

祖聞其名召之以老疾辭還有柔克齋集

詩話顧仲瑛輯元者舊詩為玉山雅集中錄高則誠作稱其長才碩學為時名流可知則誠不專以詞曲擅美也世傳琵琶記為薄倖王四而作此殆不然陸務觀詩云斜陽古柳趙家莊負鼓盲翁正作場死後是非誰管得滿村聽說蔡中郎是南渡日已演作小說矣聞則誠填詞夜案燒雙燭填至喫糠一齣句云糠和米本一處飛雙燭花交為一洵異事也蔣仲舒堯山堂外紀謂撰琵琶記者乃高拭其字則成別是一人按涵虛子曲譜有高拭而無高明蔣氏或有所據俟再考

宿詵公房曉起偶成

曉雨池上來微風動寒綠幽人睡初起開窗見修竹西

山帶層雲隱隱出林木境寂塵自空慮澹趣常足獨坐

無與言流泉下深谷

徐暉二首

暉字仲由淳安人洪武初徵秀才至藩省辭歸

有巢松集

詩話識曲者目荆劉拜殺為元四大家殺狗記則仲由所撰也其言曰吾詩文未足品藻惟傳奇詞曲不多讓古人蓋自知之審矣葉兒樂府滿庭芳云烏紗裹頭清霜籬落紅葉林丘淵明彭澤辭官後不事王侯愛的是青山舊友喜的是綠酒新筍相拖逗金尊在手爛醉菊花秋比於張小山馬東籬亦未多遜詩雖非所長然亦不俗

除夕

我家四兄弟彫零半不完存者惟二人况復髮盡斑亂
離因析居破屋各數間薄田不周饑何以能當官我比
兄更劣運蹇家多艱中年再鼓盆豈特貧且鰥落落羈
芹宮空戴儒者冠池魚與樊鳥鱗鬣欲縱難邇來遂吾
志腰脚俱兩閑歸田理松竹手植青琅玕俯視庭下孫
皎皎雙玉環坐膝挽我鬢睂目如春蘭焉知匪丘豕天

道終好還晚年得細君所執供厨餐固無桃李姿端厚
勝小蠻客來供酒脯聊足盡主歡雪消楊柳陂春動梅
花山綠窗閑香閣獸炭燒春盤何如飲長夜燭短夜未
闌酒盡墳簾鳴慷慨出肺肝願言敘天倫相期永團樂

四月十七喜王德剛過訪

故人去此久遠若天一涯雖曾入我夢未獲親見之胡
為忽叩門使我倒接鬪初逢固知喜動問還可悲香絕
二十年人事想參差吾翁與若翁世世心相知今雖盡
物化眼見孫與兒其如年運難我輩逢亂離昔為少壯
交今我窮誰依閭巷日蕭條十家九無炊向來車馬地
零落如殘碁我守先人廬強以一木支門閭設雀羅親

友過者稀焉知寂寞後君獨重來茲請君爲我留爲君
具酒卮醞發春泥封盞洗青花甕殺雞具膾脯作饌充
晨饑劇談善戲謔疊疊俱忘疲酒盡更起謀情到不復
疑君猶執謙退一飲三致辭人生無百歲焉能長娛嬉
浮雲無定蹤爝火無流輝黃河不西返白日長東馳與
君兩萍水整合仍相違但守金石心後會終可期

姚璉二首

璉字廷用又字叔器歙人元季爲理問所知事
明初與唐仲實同迎蹕于街口被顧問事見五
倫書

漁梁結屋

石梁之上姚家莊隔溪指點山蒼蒼飛樓傑閣非我事
翠竹老梅開此堂新豐雞犬歸未得韋曲桑麻如許長
三間茅屋吾老矣攜兒擬拜龐公牀

冬日

野人曝背向牆隈時飲茅柴酒兩杯滿階落葉渾不埽
拄杖去尋江上梅

唐仲實一首

仲實名桂芳以字行歙人元季南雄路學正明
初攝紫陽書院山長有武夷小橐

送湯生執中

薄暮雲已收微寒雨還作居人念睽離戚戚意不樂何

時竹屋眠共看燈花落

涂 幾 一首

幾字字約又字孟規宜黃人有涂子類橐

詩話涂君於文高自矜許集有弔余文賦云負子才之宏異兮早卓侗而莫羣較錙銖于古人子又何數乎今之人而又云芟荷不可以為衣子女羅不可以為帶則匪安於遜世者也嘗撰時事策十九篇上書孝陵自稱臣平生苦學見於文章時輩妄推謂當與漢唐諸文人略相先後使居館閣紀述聖君賢臣之事業足以載當世而垂無窮亦大言不怍矣然其文頗牽率鄉人鄒矩元方序之謂沉雄悲壯佚宕奔逸此欺罔之言也詩亦平平乏警策俗傳酒詩一卷或云是幾所作

兵後述懷

世亂遭漂泊塗窮轉寂寥每懷經濟業無補聖明朝歲
月戎機失風霜客恨銷故園春草綠隨意狎漁樵

李勝原 一首

勝原字源澤當塗人明初保障鄉里立功有盤

谷遺橐

涇縣

古木荒碑對縣門數家煙火自黃昏河流故遶山邊市
驛路斜通郭外村煙雨園林梅結子春風籬落竹生孫
愁看市井蕭條甚喪亂曾經幾戍屯

黃 樞 二首

樞字子運休寧人洪武初被徵以璧免鄉人稱

為後圃先生有後圃存橐 游汝潛云先生詩温厚平澹所以可傳

吳子芳楓林牧隱

露晞春草細林遠青楓長中有沮溺徒結廬先隴旁於

馬可耕稼自牧牛與羊搢腰笛竹短插笠山花香犢飽
夕言歸濯足澗月涼喟彼塵世人馬蹄終日忙橫眠綠
草嫩肯羨金鞍光老農願卜鄰持鞭白雲鄉招手金華
仙與爾相翱翔

婺州竹枝詞

桃花雨晴春水生東風去船如箭行鯉魚活煮蘭溪酒
篷底醉眠江月明

呂不用

三首

不用字則耕新昌人洪武初舉本學教諭以龔
辭自號石鼓山龔有得月橐

曾伯曼云則耕詩老蓮放曠有傲世不羈之懷蓋山

林草木之秀傑者 王叔雨云則耕長篇短歌無一語塵腐

題顧雲屋雲山圖

我識東吳顧文學早歲丹青動黃閣揮毫得意傲王侯
霜刮虬髯面如削一自塗窮悲濩落旅食南州夢非昨
蛟龍為魚氣鬱勃散作春雲滿丘壑乾坤無地著茅茨
寫向雲根亦奇作荒林日色曉蒼涼古木風聲晚蕭索
首陽蕨根秋土深商嶺芝苗今寂寞看圖為問人何在
晚交駐意歸猿鶴

東山寺題樓壁

白雲幾曾散却作一樓貯明月夜夜來無人敢攜去

題送別圖

何處瞻衡宇西江煙水村彭郎磯上月送汝到柴門

沈夢麟 五首

夢麟字原昭歸安人元末武康尹入明以賢良
徵不仕有花谿集

詩話原昭元季隱於花谿劉伯溫曾相依谿上贈以詩云杜陵老去詩
千首陶令歸來酒一樽及入明雖不受爵而校文閩浙者三同考會試
者再故孝陵以老試官目之其分校閩闈在洪武丙子歲當時同考官
有劉子彥蔣文質劉季治蘇鳳儀均有詩酬和今不能悉舉其名矣花
谿在歸安縣治東南七十里土人名曰花城原昭田產頗饒其子孫坐
處三楹屋門外家家半曲湖婦踏水車歛抱子兒撐漁艇笑
驚鳧想見風景之足以移情矣原昭詩格清穩特少警拔句

余中

余中瀕海門望望斥鹵地居民多四散共享牢盆利昔
人生厲階於此置官吏推鹽限程期立筴事鞭箠煙飛
朱火騰海立銀濤沸漉沙鉛淚凝椎甃瓊英碎天高歲

崢嶸草白北風厲玄雲閑萬竈積雪照千里陸輸車軋
軋水運舟尾尾雖云國課集民力已彫瘁蹇驢歷亭場
攬轡察地里大江繞長淮殺氣寒鼻鼻增科苟不息禍
亂恐未已吾將叩閭闔悵悵訴微意狂言儻欺君薄命
有如水

野航

一室淨無塵門通画舫鄰若分鷗鷺席能受兩三人江
水家家綠溪花岸岸春杜陵貪佛日隨意賦詩頻

中秋夜泊黃河

黃流滾滾浪翻盆百尺飄檣上下奔月色偏於今夜白
河源不改舊時渾雷行西北通天極風送蛟龍入海門

欲醉一觴歌九敘千秋萬歲禹功存

趙待制席上

春城飛絮日顛狂
簾幕風微燕子忙
醉後不知羅袖薄
牡丹花上月如霜

發華家步

華家步頭山作城
溪中小船如奕行
五更風雨到蓬底
八十二灘春水生

滕克恭一首

克恭字安卿祥符人仕元為集賢院直學士遇亂避地錢塘洪武初兩聘充本省考試官有謙

齋豪

李川父云先生詩律清婉頗有足觀

詩話崑山周壽誼一百一十四歲魏觀守蘇州舉為鄉飲賓新昌呂不用有叔祖百歲作百歲老人歌其辭曰吾家老人一百歲益益晴檐曝駘背自言生見宋餘黎元氏興亡身尚在大明洪武聖人作坐沐雨露又七載蓋兩人皆生於宋歷元及明尚存信人瑞矣然兩人初無文采表見斯猶草木之年爾若吾鄉鮑仲孚八十餘被徵以白衣克會試考官歸田久而後沒吳興沈原昭錢塘寓公滕安卿皆以元廢官屢典文衡原昭年九十安卿至百有餘歲斯則儒林之盛事也

寄李提舉

錢塘經亂後應是減繁華
遠信秋憑鴈鄉魂夜到家
兩江罹戰伐四海廢桑麻
何日重攜手春風汴水涯

葉顥四首

顥字景南金華人有樵雲獨唱

顧俠君云景南自序所作詩以為薪桂老而雲

山高寒音調古而巖谷絕響故名其集曰樵雲獨唱長孫雍編次成帙曾孫戶部尚書淇重刻之廣東布政使安丘素凱為之序詩集稱顥字伯愷洪武中登進士官行人司副免歸按集中挽荆山上人云大德庚子春生我及此公以年計之當洪武戊申景南年六十有

九矣詩多高曠之言絕無及仕宦者凱序云使先生後生數年際我朝之明盛與一時俊乂竝列庶職其事業必有可觀惜其不然而徒於言語文字間見之其志不亦可哀矣乎袁序作於成化間不應有誤所云未知何所據也又震澤編所載東山葉顥字伯昂嘗以鄉貢為和靖書院山長此則又一同名姓者爾

詩話永康應廷育撰金華先民傳乃不及葉顥牧齋謂顥登洪武進士考之登科錄惟建文庚辰榜有葉顥金華縣人樵雲既生于大德庚子洪武初元年已六十有九至建文二年則百有餘歲始釋褐矣無是理也今改從顧氏

漁父曲

雨過暮雲收江空涼月出輕蓑獨釣翁一曲秋風笛宿鷺忽驚飛點破煙波碧

秋懷次童中州韻

長空好明月燦爛今夕晴萬里皆月色四顧無人聲徘徊下青松照我茅屋明我望長歎息悠然萬感生取杯

挹清光
和此松露傾
嚙之清肺腑
快我平生情

九日寄興

黃菊香殘夜雨烏紗醉
落秋風回首十年舊事亂雲流
水西東

月夜梅邊即事

香裏寒雲滿溪月明津渡人迷夢入江南舊路夕陽流水橋西

張庸九首

庸字惟中慈谿人元季兵亂竊據者署為上虞

山長不就明初聘不仕有全歸集

烏繼善云處士律詩渾淪雄偉鏗鏘

典麗不待論矣其歌行性所喜而尤用意者如長江萬里其靜也湛然一珎石雲漢萬里參錯其內及其怒也波濤奮迅蛟龍魚鼈出入其中而

莫之測 馮損之云先生與寓公都事龍子高編修馬易之少監
揭法正字桂彥良爲倡和交風晨月夕意有所到一於詩發之
詩話惟中高遜世之節然與龍提學子高桂正字彥良烏永新繼善諸
君子先後往還酬和其送胡維舟金陵歌云金陵帝都天下壯萬國會
同天浩蕩昔年聘我我曾游曾上鳳皇臺上頭則明初亦嘗
受聘幣而未通籍者殆昔人所云隱不違親貞不絕俗者邪

桃花牛歌爲桃源山人王敏功賦

五陵年少五花馬兩耳生風汗流赭金絡絲韁白玉鞭
鬪雞每過長楊下桃源山人桃花牛青蒲爲韉繩作鞦
不與年少爭風流來往桃源溪水頭桃源由來風景美
桃花無數亂紅綺花飛片片點牛身幾度春風吹不起
春風浩蕩日色和款款騎牛行且歌唐虞世遠知奈何
笑指落日如流梭君不見中原戰爭時已久白骨相撐
豺虎走五陵年少家何有流落江南衣露肘江南又復

兵甲興天下紛紛何日寧我欲騎牛亦向桃源去只恐
漁郎知住處

殺犬謠

君不見天媚墓被墓瞎人養虎被虎齧玉川作詩何激
烈主人養犬忘施恩一朝難作身取滅當時得犬一尺
高身上襦褌覆金毛朝夕呼之餒飼勞一月不見大如
燄金鈴懸項食人食家人睥睨那敢叱風吹簾影聞吠
聲日轉花陰見行跡毛色纔深親爲剪舞裯容卧不教
卷犬心有恃挾其曹舐鐺翻甕日驕蹇主家綺席羅高
堂豹胎熊掌雜羔羊厭犬之橫蹴犬去利主之食齧主
吭壯士聞之氣憤結手揮金錘犬腦裂磔犬之肉祭犬

血主人之讎始一雪嗚呼世降忠義銷不獨人間犬作
妖項家有奴類如此試作王公殺犬謠

賣驢買牛歌為胡維舟賦

驢可以跨不可耕牛可以耕還可跨山人賣驢歸買牛
買得牛來頗同價溪雨初收水繞門山人曉耕溪上雲
土膏不覺秋成早香秫釀成新酒渾翻思養驢竟何益
空將芻豆飽其食軀小蹄薄終無力有時跳梁蹶側石
草深牛背穩於舟浩歌白石南山秋却笑哦詩灞橋上
滿身風雪歸來休

腰帶鈴

腰帶鈴郵夫傳命風火生夜逢猛虎當前行銜入南山
鈴有聲鈴有聲被虎食夜夜山邊候人隙十里嚴程時
四刻後知來者還絡繹君不見官拾斷鈴重鑄鑼虎怕
鑼聲將渡河

行路難書所見

昨朝殺虎潘家園今朝殺虎蘆浦團獵人羽箭銅牙弩
連朝殺虎來送官送官歸去日將夕沙路紛紛皆虎跡
四山哮吼刮腥風手驚弩隨那能射君不見一虎死百
虎生行路難路難行

癸丑歲梅溪聞鷓

杜鵑生子百鳥巢百鳥哺之成羽翼飢鷹及目不敢親
百鳥亦自逃荆棘千年遺恨只自憐四野無營何處食

空將憤氣結春愁勸人歸去成何益我家只在鄞江頭
欲歸未歸汝知不有人正逐中原鹿無心更理梅溪舟
汝身胡不自歸去錦官城裏多高樹尾長翼短路復迷
雨橫風狂春已暮且向庭前樹上棲莫向天津橋畔啼
丙午歲感懷

中原無限好山河都付尊前感慨歌斗酒十千愁裏醉
三春一半雨中過落花寂寞渾無數短髮飄蕭白更多
苦欲山深延暮景憑誰一舉魯陽戈

揚子江晚泊與同舟劉伯瑾諸公

東鄞倦客家何許北固鐘聲暝却聞小汛候潮船已泊
上弦看月鏡初分憑誰貰酒酬三益且自題詩詠五君

謾憶南湖垂釣處磯頭新水綠生紋

梅

拄杖尋春路不賒小橋流水野人家千年老幹屈如鐵
一夜東風都作花

藍仁 二十四首

仁字靜之崇安人明初內附隨例徙濠尋放還

有藍山集

蔣師文云靜之昆仲切磨墳簾迭奏和平雅澹辭意融怡語不雕鏤氣無脂粉出乎性情之正而有太平之風

惜其不列承明著作浮湛閭里傲睨林泉有達士之襟懷無騷人之哀怨即屢更患難而心恒裕如要其所作皆治世之音也 張雲松云靜

之詩平居時優柔冲澹處患難則憤激而憂思交朋友則眷戀而情深歲規而意篤不怒罵不諛諂不蹈襲以掠美不險怪以求奇麗則而不

苟雋永而有餘深得詩史之遺意 陳廷器云藍山詩力追盛唐規員矩方靡不合度 蔣仲舒云二藍勢力相敵已入作者之室

詩話二藍學文於武夷杜清碧學詩於四明任松卿其體格專法唐人間入中晚蓋十子之先閩中詩派實其昆友倡之藍澗仕而藍山隱其

戲題絕句云朝野文章自不同壤歌何敢敵黃鍾山林別有鈞天奏長
在松風澗水中然其述懷詩云無才甘下位有識笑庸人又云何事漁
磯棄空煩鵲印隨又有甲寅仲冬攝官詩題則靜之亦不終於山林者
也集有蔣易張榘二序易字師文自號橋山真逸嘗選皇元風雅子有
其書榘字孟方自號雲松樵者靜之贈詩云
文宗曾子固篆逼李陽冰惜其著作罕傳矣

秋山懷友

天寒草木疎落日照平野孤雲西北馳獨鳥東南下仰
聆寒蟬悲俯見驚湍瀉物情自索寞秋色正瀟灑良朋
久相違離思何由寫

擬貧士

二首

蠨蛸網我戶蟋蟀號我壁被褐不掩脛采薇豈充食歲
有飢寒憂巷無車馬跡豈知曠達觀不以貧病迫昔聞
孔顏聖亦有陳蔡厄澹然忘世慮弦歌自朝夕

蓬門有一士被褐恒苦飢朝飲南澗流暮食西山芝雖
有二頃園蕪穢亦不治妻子共寂寞彈琴詠書詩荒林
積雪深古屋炊煙遲高卧自有適何必他人知

宿田家望武夷山

仙厓蓄靈異怪石盤空曲一水隔花村千峰入茅屋金
芝暖逾秀瑤草寒更綠雲中武夷仙一一顏如玉白馬
去不歸玄猿叫相逐昔陪丹丘侶酣歌紫霞谷雞鳴洞
天曉落月在林木空瞻仙子高舊夢那可續荒林激悲
風日入對樵牧佇立望歸雲解衣田舍宿

暮宿田家作

木落天正寒山空日將暮荒林倦鳥歸亂水行人渡窮

年滯草莽短褐被霜露晚宿依田家人情亦故汲水
泉滿澗燒竹煙在戶鐘殘溪上村月照階前樹濁酒初
潑醅嘉蔬亦時具且慰飢渴懷况諳村野趣老翁八十
餘有子沒征戍秔稻歲莫收官司日加賦我願息兵戈
海宇重農務媿乏經濟才徒然守章句

正月十四日西山感興

久曠山水遊今晨願無違松林收殘雨郊園澹朝暉
澗弄清泚緣岡陟翠微池魚暖始遊巖花寒尚稀高人
坐空堂深竹對巖扉山中聞犬吠谷口見樵歸心賞適
有契仙遊詎能希賴此一樽酒暫然息塵機古來朝市
間榮華多是非所以首陽士白首當采薇

風雨不已川流渺漫感事敘懷簡我同志

雲雷中夜興風雨達清旦開門山木昏隱几波瀾亂
鶴下空庭蛟螭上高岸舟航遠樹杪石壁中流半黍豆
或漂流蓬蒿乃滋蔓北風不埽除南海盡瀰漫迺知兵
戈氣鬱結久不散坤軸恐欹傾陽烏失光燦傷哉轉淒
涼涉世正憂患微躬媿鳥雀何由塞天漢

暮秋懷鄭居貞

季秋霜露降草木日已衰暮登城門丘遙望滄海涯鳥
鳴求其羣况在遠別離美人顏如玉夢寐恒見之飄蕭
紫鳳毛照耀珊瑚枝海水不可越丹砂詎能期盪盪杯
中酒泠泠桐上絲豈無一日歡念子來何時少壯難合

并流光倏如馳悠悠逝川歎渺渺停雲思

宿橘山田家懷蔣先生

蒼峰落日微白鶴秋風遠客路入疎鐘田家背山阪孤
煙桑柘寒歸鳥茅茨晚欲覓紫芝翁山深白雲滿

西山暮歸

涼葉墜微風秋山正蕭爽天寒獨鳥歸日夕百蟲響偶
從桂樹招遂有桃源想石磴闕無人山後自來往

暮歸山中

暮歸山已昏濯足月在澗衡門棲鵲定暗樹流螢亂妻
孥候我至明燈共蔬飯佇立松桂涼疎星隔河漢

題鄭德彰員外所藏高彥敬畫楚江春曉圖

旭日未出羣山昏蒼茫楚江多白雲芳洲無人采蘅杜
落花飛絮春紛紛晴嵐滿戶漁家曉花枝髣髴聞啼鳥
巫陽夢斷三峽空湘渚愁深九疑小風流文采高尚書
如此江山歸畫圖平湖煙靄水空闊陰壑松檜天模糊
左司郎官何處得高堂紫翠生春色是中疑有五湖人
一葉扁舟蕩空碧

雲峰秋霽圖為方煥賦

茅屋溪頭紅樹村石梁秋水清無痕粉榆過雨鳥鳴澗
秔稻如雲山對門老翁日高睡未起穉子讀書窗戶裏
干戈如此賦斂煩雞犬晏然鄉曲喜山中酒熟黃花開
仙叟候我芙蓉臺雲林今夜好明月擬跨幔亭黃鶴來

贈武夷魏士達

武夷山水天下無層巒疊嶂皆畫圖山川直疑渾沌鑿
秦漢而下靈仙都中天積翠開宮殿石壁虹光夜如電
鸞鳳常驂神姥遊猿猴共醉曾孫宴洞中別有昇真天
瓊林遺蛻如枯蟬露盤仙掌千年藥春水桃花九曲船
萬松岡頭羽衣客更入三山采真訣神游不計海天遙
夢覺長懷海天白歸來高隱萬年宮天香時降雙青童
道參元始鴻濛外身寄虛空象緯中嗟予久慕煙霞侶
天遣空山作詩苦清歌曾遶幔亭雲凍筆空題草堂雨
金丹擬就玉蟾分木葉西風鐵笛聞野老只知堯舜世
樵夫或遇武夷君

寄余復嬰

道士清溪住扁舟久未回井垂霜後橘門掩雨前苔
鳧長相候魚書杳不來虹橋他日宴又負紫霞杯

石村除夕

衰病身為累窮愁歲又除枕戈鄰境靜卜宅遠村居
海舶追編戶山田責簿書應門兒不暇休問過庭疎

寄張兼善

故人卜隱依山寺野老遷居到石村濁酒近篋謀共醉
新詩未穩許同論南風吹笋初成竹宿雨移松已引根
肯向草堂尋杜甫百年地僻有柴門

病起偶成

春來春去總怱怱九十光陰卧病中緩步也愁平地險
加餐不與去年同生增野草侵階綠可惜殘花過眼空
昨日鄰童偶相值不知何處一衰翁

寄雲松

雲松隱者巢居處上有屏山下藉溪花徑夕陽眠鹿豕
釣磯春雨集鳧鷖十年種木春林遠萬卷藏書草屋低
久欲相從叩羲畫負苓長往碧巖西

梅村與雲壑會宿

清泉白石趣難忘又得春前會草堂對酒先拚今夕醉
題詩還倚少年狂山林寂寞形容老冰雪閒關道路長
共愛雞鳴聽山雨後期何處更連牀

小樓對雪有懷西山道人

西山白雪一丈深北風吹倒長松林千厓無人虎豹死
中夜有客烏鳶吟高樓此時最相憶弱水隔海知難尋
凡身毛骨更蕭爽願借黃鶴棲雲岑

雲壑寄惠黃楊木簪并詩

黃楊爲木至精堅寸榦三春長未全偶乞餘材簪短髮
兼煩佳句寄衰年籜冠不用傷人正櫛笠還宜覆頂圓
慚媿病軀梳沐少鬢髮雙鬢日高眠

賦網巾

白頭難掩雪霜蹤纖手穿成絡索同映帶暮年微矍鑠
遮藏秋色久鬢髮牽絲祇訝蛛臨戶覽鏡翻愁鶴在籠

便與黃花相見好不愁破帽落西風

詩話網巾之制相傳明孝陵微行見之於神樂觀遂取其式頒行天下冠禮加此以為成人三百年末之改然題詠者寡獨藍靜之有三詩子錄其一焉其二詩謝劉蘭室見惠而作一云故人於我最相親分惠青絲作網巾鏡裏形容加束縛眼中綱目細條陳少遮白髮安垂老轉觀烏紗障俗塵更與籜冠藜杖稱世間還有葛天民一云故人念我鬢毛疎結網裁巾寄敝廬白雪盈簪收已盡烏紗著紙畫難如門臨寒水頻看鏡籬掩秋蓬不用梳昨日客來應怪問衰容欲變少年餘

題青山白雲圖

茆屋何人共住石林似我曾遊白雲只在半嶺青山誰到上頭

王沂八首

沂字子與泰和人洪武初徵為諸王說書授福建鹽運司副使以老辭歸學者稱為竹亭先生

後以孫直貴贈光祿大夫少傅兼太子太師吏

部尚書與弟佑俱以詩名有竹亭遺藁

烏繼善云子與四言

詩春容嫺雅如陶淵明五言冲澹瑩潔如魏晉齊梁七言宮詞情景悠遠如王建七律歌行典麗鏗鏘莫非方軌盛唐諸君子胡行簡云子與詩根於學問之功發乎性情之正冲澹高雅音韻鏗鏘卓然成家非世之琢句鍊字極意模仿者比彭聲之云先生五言迥出流輩瑩如冬冰清如秋露馥如春蘭潤如夏籜歌行有天驥之馳驟無寒蛭之悲鳴而律絕之佳者若秋水芙蓉映照初日清麗無塵胡光大云子與詩春容典則優入盛唐楊東里云竹亭先生於詩古體用意魏晉以上近體不肯出中唐下梁用之云先生昆弟肆力於詩與大梁幸好禮楊伯謙上元周伯寧清江彭聲之豫章萬德躬倡詩學於東南觸景遇事凡可喜可愕可怒罵可太息者一寓於詩音調格律之嚴必合於典則所傳二妙集者門人蕭暉所收輯直十百中一二耳鄒仲熙云先生之詩平澹簡遠如玄酒在尊而自有至味非世俗夸靡相尚者可企及也

詩話子與詩格清婉如水墨雲山絕勝調鉛殺粉

題觀泉圖

日言卷十一
三
恣彼泉水其清瀏瀏既出于山亦經于丘原則有坎陸
則有岐汪汪洋莫知所之奔壑西馳經天東注夫豈
性然勢激而寓斂此涓滴至于尋丈隨波同流惟海是
向彼觀泉者朋簪童琴洗耳其操濯纓其心鳴雨林臻
霏雪厓至時不待人圖不盡意漆園蒙莊妙契淵默君
子人與果行育德養正之功有漸無已勗爾後來是之
取爾

由竹垞望錦川桃李春色如画有懷陳邑令

涉淺上輿梁憑高眺鄉縣灼灼桃李花層層遠皆見兵
餘草根盡此地芳菲徧氣暄雉雙雒景淑鷺百轉邑里
齒故繁絃歌俗丕變懷賢思如渴敷政速於傳孰是潘

安仁而猶宓子賤

九月十一日鄰寇逼境倉皇南渡感賦

鄰邑舉烽燧長驅寇南平中宵始聞警挈家遂遠行倉
皇具舟楫所志惟弟兄初營暫涉水將謂復還城歸塗
逼煙燄戎馬亂縱橫父子兩隔絕慘哉生別情慈親力
疾起負掖同遐征饑分路人食渴飲田婦羹兒童不遑
息踽踽昧前程為謀苦不早臨難迺無營前事杳難測
逢人空涕零存亡有至理瞬息且偷生

望南屏山同呂仲鉉仲實作

游目南屏山逍遙稅塵鞅清溪亂流涉疊巘綠雲上輝
輝瀑泉落隱隱天籟響荒塗理通塞虛室靜弘敞中有

餐霞人長矚御風想不乘緌嶺鶴還顧漁郎舫芝草甘
若飴雕胡大盈掌雖為頽齡駐亦忌流光往永懷山中
遊觀化歷清賞

壬寅紀異同劉以和賦

壬寅仲春天雨雹南屏城中盡驚愕初從屋瓦亂崩騰
散入階除更跳躍兒童不識挽衣盛兩兩相看恣相謔
老年閱歷憂患餘却顧兒童淚雙落春秋咎徵不一書
茲事班班宛如昨自從兵變十年來瀕洞風塵亘沙漠
奮當車轍小物為天理何嘗宥元惡竊聞李郭收兩京
元氣依然萃光岳旄頭夜夜燦中天風虎雲龍聖人作
嗚呼風虎雲龍聖人作吾徒勿憂在溝壑

過臨江訪彭聲之

金鳳洲邊路維舟重憶君江虛秋氣入沙淨曙光分斷
鴈前汀起鳴鐘隔岸聞因過鑑池上詩思亂愁雲

小莊道中

客路千厓裏春風二月中虎蹄荒徑少鷺語故鄉同澗
水縈迴綠山花自在紅物華空滿眼去意只怱怱

秋江送別圖題贈黃通守允中

秋江木落楚天低目送歸船渡聶溪莫道浮雲千里隔
君山只在洞庭西

陳調一首

調字仲昌閩縣人布衣隱居石潭以子叔剛貴

封監察御史

倚竹歌

修竹子青青中虛兮外直素節兮貞姿寒暑兮一色冷
冷兮朝夕予舍之兮焉適

易 恒 二首

恒字久成廬陵人徙家崑山洪武中應薦至京

以老罷歸有陶情集

莫士安云久成年逾八十有四而能吟詠太平娛樂晚節短句蘄絕長什冲融

近體齊整不難步追先古 周叔訓云久成五古優柔

詳雅七古敦厚春容近體清新美麗誠為治世之音

詩話陶情一集邊幅太拘其示諸生詩云情婉

味終涵雋永調高語不在矜持其所尚然也

晚泊揚子江口述懷

落日雲山外孤舟野寺陰招魂悲楚些歌榜起吳音風

色洲前定江痕雪後深頻呼秣陵酒聊慰白頭吟

風雨憶灑西

故園十畝瞰林塘花竹陰陰覆小堂好友肯來惟一二

老夫不出是尋常白魚寒鱸槎頭雪朱橘秋嘗屋角霜

雨雨風風歸未得空勞飛夢繞滄浪

逯 昶 一首

昶字光古修武人有逯光古集

詩話光古詩學晚唐句如潭潭開天鏡山昏著霧巾樹枝猿挂折花片
鳥銜來僧舍竹松院人家瓜菜園雲來羣壑暗日下半川明秋色老樓
樹夕陽明在山令賈島
佛見之當亦點頭也

舟下淮水

伐鼓下淮津川光迴暮色數峰雲外青一鳥沙上白悠

悠水驛浮颺颺風帆側舟人有嚴程知我歸朝客

韓奕八首

奕字公望吳人有蒙齋集

公望生於元文宗時少目眇筮得蒙卦遂扁其室曰

蒙齋絕意仕進與王賓偕隱於醫姚善守吳造請之公望於布簾內答云不在一日掩入其室公望走楞伽山善隨至則泛小舟入太湖善歎息曰韓先生所謂名可得聞身不可得而見也當日吳中高士以公望與賓為稱首

詩話明初吳中高士三人一為長洲王賓仲光一為崑山王履安道其一則公望也三人皆隱于醫仲光詩多俚率安道遊華山作詩一百五十首然無足錄者必以公望為巨擘焉

秋齋

林居近冬候雨晴天已冷露蛩啼夕陰風竹亂窗影衰
來身自覺欲寡事斯屏偶此山中人清談坐宵永

夜訪隱者家

舍舟陟伊岸遠思一翛然幽人田中廬高柳當門前微
月照疎雨夜花靜涼天相見愜始願懽言殊未眠

湖州道中

百里溪流見底清苔花蘋葉雨新晴南潯賈客舟中市
西塞人家水上耕岸轉青山紅樹近湖搖碧浪白鷗明
櫂歌誰唱彎彎月彷彿吳儂子夜聲

春望次韻

春城柳色幾家連廚舍多時似禁煙處處綠蕪生夜雨
村村白水落平田花稀野圃東風外人遠江天去鴈邊
盡日百花洲上路往來惟有一漁船

寄江陰夏翁

殘山剩水舊吳宮幾度相期杖屨同夜雨新晴桃葉渡
春寒已過杏花風人生暮景方多暇春事濃時一半空
邂逅逢人因問信酒船何日過湖東

春思

積雨柴門草色新一經白首又青春也知性癖難趨俗
却喜身閒不屬人冷食鄰家將禁火軟泥門巷不生塵
高懷誰肯同蕭散放櫂煙江采白蘋

雜興

一巷西風落葉半窗斜日殘書年老怕逢人事天寒不
出吾廬

惜春

漠漠晴光淡淡天山青水白景依然杜鵑啼處花如雨
白髮傷春又一年

王 賓 一首

賓字仲光長洲人有姑蘇雜詠

錢受之云仲光與姚榮國交榮國定策後徒步往訪歡若平生作賑災記鋪陳其功德沒而榮國為立傳兩公契分如此世傳仲光詆譏榮國方監却走終身不見吳兒委巷妄語流談史家不可不正

越來溪

吳人舊地越人開岸上誰將柳樹栽春水綠波三二月
画船全是賽神回

明詩綜卷十一

國語全皇本新四

英人善此欲入開義工部部特憐為春木社友三

錄來點

實字中米身附人亦故

王

詩變處各又一中

雲如如天山青木白景於

